

Insait long dispela wik...

Today

September issue inside

Nius - P2, P3, P4

Olpela medikol sip i kam long Mosbi - P2

Komentri P 13

Mekim moa wok painimaut pastaim long wara saplai bilong Mosbi...

PIH Saveman Nius
Niupela Helt nius olgeta wik insait long pes 7...

PNG mas senis...



Antap: Ps Daniel Hewali i makim ol para-sios i tok PNG bai i gat nupela nem olsem profet Aisaia i tok long buk Aisaia 62:4. "... Bai ol i kolim yu long nupela nem olsem, 'Mi amamas tru long en (Hephzibah),' Na graun bilong yu bai ol i kolim, 'Meri i marit pinis,' (Beulah).

Daunbilo: Ol mama i save krai long kantri bai senis na ol mama na pikinini bai sindaun gut. Dispela ren long Ogas 26 i no stopim ol long go beten long ai long haus palamen. **Poto: Frieda Sila Kana**

PM, Polye salens long K9bilien dinau

Stanley Nondol i raitim

PRAIM MINISTA Peter O'Neill na pastaim Minista bilong Tresari, Don Polye i salens aste long Palamen taim Mista Polye i askim Praim Minista long tok klia long wanem hap bai kantri i kisim mani long bekim K9 bilien gavman i mekim komitmen na yusim we i no stap long 2014 baset.

Mista Polye i tok em i kisim ripot olsem gavman i yusim mani ausait long baset i sanap nau long K9 bilien. Antap long en, em i tok kantri i mekim dinau baset long 2014 long K1.3 bilien mak na em i askim sapos winmani bilong LNG projek bai inap long bekim ol dispela dinau baset.

Praim Minista O'Neill i tok gavman i no mekim ol komitmen long ol projek long K9 bilien. Em i tok dispela toktok i no tru na em i askim Mista Polye long givim moa ripot o tok-tok long rot em i kamap wantaim K9 bilien.

I go moa long pes 2...



Need a Loan? Not a TISA Member? **NOW YOU CAN!**

KWIK CASH

A Credit Ready facility for Public Servants in the Country @ 1% Interest Rate / month.

Member Benefits:
 >>> Instant Loans >>> Instant Savings >>> Instant Approval >>> Instant Membership >>> Easy Access >>> Available To All Public Servants

Apply Now! Contact your nearest TISA Office Email: marketing@tisa.org.pg Website: www.tisa.org.pg or Visit us @ Vision City Mall - Thursday to Saturday (in the month of August)

PORT MORESBY: 300 2200 LAE: 472 4933 MT. HAGEN: 542 2733 KOKOPO: 982 8256 GOROKA: 532 3511 ALOTAU: 641 0161 MADANG: 422 2305
 KAVIENG: 984 1177 WEWAK: 456 1177 BUKA: 973 9400 MANUS: 970 9198 KIMBE: 963 4045 VANIMO: 457 1398 POPONDETTA: 629 7406 IALIBU: 540 1758

KWIK CASH
BOOTH NOW OPEN
 @ VISION CITY
ONLY IN THE MONTH OF AUGUST, ON THESE DATES:
 7th - 10th (Thurs, Fri & Sat) 21st - 23rd (Thurs, Fri & Sat)
 10th - 10th (Thurs, Fri & Sat) 28th - 30th (Thurs, Fri & Sat)



Baiometrik masin long Lae i egensim lo

Bustin Anzu i raitim

GAVANA bilong Morobe i tok long kamapim dispela baiometrik program insait long Lae siti mas kisim gut tingting bilong ol ol pipel pastaim long wanem, em raitis bilong ol em ol i laik kisim.

Mista Naru i tok baiometrik program em i olsem brukim bikpela lo bilong kantri long kisim piksa long pes bilong man, kisim finga print we lo ino tok orait.

"Mi no lukim wanpela mama lo bilong kantri i givim tok orait long ol manmeri mas givim poto long ai bilong ol, print long han pinga bilong ol. Dispela em i olsem ol i fosim ol manmeri long mekim. Nogat wanpela lo i tok orait long dispela," Mista Naru i tok.

Em i mekim dispela toktok long ples Tararan long namba 29 bung bilong Wampar Seket Konferens long las wiken.

Mista Naru i mekim dispela toktok bihain long Memba bilong Lae Loujaya Kouza i ronim dispela projek long mani mak long K5 milien long Lae

siti long las yia, we ol i laik kisim piksa bilong ol, poto long ai, finga print na ol narapela samting na putim i go insait long kompyuta rekot.

Gavana i tok mama lo bilong kantri i tok olsem olgeta manmeri mas i gat banis bilong ol yet na noken givim ol dispela kain infomesen o rekot olsem benk akaun, haus sik ripot na ol narapela samting bilong ol pipel.

"Em ol praivet samting bilong yu yet na wanpela man o meri i no inap kam na fosim yu long kisim ol dispela infomesen. Sapos ol i kisim, ol i no bihainim tingting bilong mama lo na dispela em ol i brukim lo," Gavana Naru i tok.

Kouza i bin tok olsem dispela program em bilong kisim ol data (rekot) bilong ol manmeri insait long siti na putim long masin, we bai helpim em long kisim ol gavman sevis i go long ol blok na setelmen we ol manmeri stap long en.

Naru i bin tok long dispela taim tu olsem dispela baiometrik program nau i wok long kamapim traipela hevi o pret long ol Kristen komyuniti

bilong Morobe long wanem, dispela program i bihainim propesi bilong Buk Baibel olsem wanpela namba bilong giaman Kraisi bai kam, olsem i stap long buk bilong Revelesen.

Naru i tok sapos Memba i laik kisim dispela kain program, em mas toktok gut wantaim ol Join Distrik Praioriti na Baset Plening Komiti (JDP & BPC) na ol arapela stekholda na skelim tingting long dispela.

Wankain tu long Komisanim Lae Siti.

Gavana Naru i tok dispela ol samting em ol bikpela samting na i gutpela long ol i sindaun wantaim na paitim toktok na kisim gut tingting long ol dispela samting na ino long laik bilong memba em yet. Dispela samting em bilong olgeta manmeri na ino bilong wanpela man tasol.

Em i tok tu olsem em yet i Deputi siaman bilong Lae Distrik Join Distrik Plening na Baset Praioriti Komiti na em i no save olsem wanem ol i putim mani long kamapim dispela wok bilong baiometrik. Ol i wet yet long kaikai bilong dispela wok.

Olpela Medikal Sip i kam long Mosbi



Dentis bilong YWAM sip, Dokta Lynette Wallace na HEO Jacky sekim tit bilong ol Stimsip Treding Kampani woklain long wan wik bilong ol long Pot Mosbi.

Poto: Frieda Sila Kana.

OL pipel bilong Pot Mosbi i kisim gen sevis long Yut Wit A Misin (YWAM) Treding na Medikal Sip long laspela taim tasol ol bos bilong sip i no kisim inap mani yet long baim nupela sip.

Dispela sip i gat 35 krismas na i wanpela olpela sip i save karim ol volantia bilong mekim helt sevis long ol ruel eria bilong Galp na Westen provins.

Em i las taim bilong MV Pacific Link long putim anga long kepatal siti long wan wik na ol helt woka i mekim wok wantaim ol helt sevis long siti, bikos long pinis bilong yia em bai go malolo.

Sip hia i strong yet na em i save karim 50 volantia i kam long 12-pela kantri, PNG wantaim. Ol helt volantia bilong sip i wok wantaim ol helt woka insait long siti long mekim ol wok long stretim tit, ai na helpim ol eben helt klink na tu long wok wantaim ol sejen dokta bilong Pot Mosbi Jeneral haus sik long wokim ol ai operesen.

Tasol YWAM i gat bikpela toktok i wok long kamap yet wantaim kain kain stekholda long painim mani bilong baim nupela sip, MV Ammari, em gutpela na nupela moa. Olpela sip MV Pacific Link, i liklik tumas na i no inap long wok long wanpela yia insait long ol wara na solwara bilong PNG long karamapim 500 pesen operesen long karamapim wok long Sauten Rijen na Huon Galp.

"Em i bikpela samting long ol volantia bilong mipela i nap long wok wantaim long lokal helt profesenel long Pot Mosbi long taim bilong Nesenel Helt Wik," Dokta Sarah Dunn, i tok.

"Bel bilong mipela i stap tu wantaim ol ruel helt woka husat i save wok long hatpela ples tru we mipela i save stap

planti taim. Nupela sip bai helpim mipela long helpim ol komyuniti bilong PNG moa," em i tok.

Dokta Dunn i tok olsem i gat sampela hap ples long nambis i lukluk sore stret long taim ol tim i save go mekim wok raun.

"Mipela i gat strongpela tingting long mekim gutpela wok long painim moa mani long kisim nupela sip long mipela i ken mekim moa wok long helpim ol komyuniti na ol helt atoriti bilong ol long ol i ken lukim ol sevis bilong ol i sanap strong yet."

Menesing Dairekta, Ken Mulligan, i tok moa olsem, "Maski sapos sevis bilong MV Pacific Link i kam long pinis bilong en, stori bilong em i no inap pinis yet. Mipela i gat bikpela tingting long patna wantaim ol pipel bilong Papua Niugini na mipela i laik helpim ol na wok wantaim long nau na long ol yia i kam bihain. Tingting bilong mipela i stap strong long painim K11.4 milien taim mipela kisim 4 Disemba 2014 long baim dispela nupela sip. Dispela nupela sip bai bringim moa hop long ol biklain i stap long ol ruel eria bilong Papua Niugini."

Mista Mulligan ii tok tu olsem em i gat bikpela amamas long Dipatmen bilong Helt, Nesenel Kepital Distrik, Westen, Galp, Milen Bei, Oro na Sentral Provinsel gavman, interOil, Stimsip Teding Kampani, PNG Pots Kopresen na Curtain Bros.

Em i tok tenkyu long Dipatmen bilong Nesenel Plening long givim K4 milien las yia olsem deposit long baim nupela sip. Ol i painim yet wanpela baia bilong MV Pasifik Link bihain long em i ritaita.

Medikal Simposium bai kamap long Goroka

PRAIM Minista Peter O'Neill bai opim namba 50 Enuel Medikal Simposium o konprens long Goroka long Sande 31 Ogas.

Dispela em i bikpela helt bung i save kamap long mun Septemba olgeta yia we old okta, nes na ol bikman na bikmeri bilong Helt Dipatmen na ol ovasis dokta ges ii save bung long toktok na glasim ol bikpela samting i karamapim ol helt isu long PNG.

Moa long 600 deliget i rejista pinis long stap long dispela kibung. PNG Insitutut bilong Medikal Risets (PNGIMR) na lsten Hailans Provinsel Helt Atoriti i go pas long holim dispela symposium.

Bikpela toktok bilong simposium em, "Samting i kamap long 50 yia na salens long bi-

hain." Bihain long ol i opim kibung bai gat tripela de long ol klinikal, risets, helt edukesen na menesmen ekspet i givim ol pepa na toktok bilong ol.

Dispela medikal bung bai toktok long ol bikpela wok i kamap pinis long helt sekta na tu bai lukluk long wanem kain ol salens o hatwok i stap yet.

"Dispela bung bai kamap olsem pos motem bilong helt sekta long lukim wok bilong helt long las 50 yia na long toktok long wanem rot bilong bihainim nau," Profesa Peter Siba, Siaman bilong 2014 Simposium Komiti i tok.

Ol sampela bikpela toktok em bilong helt bilong ol mama na pikinini, ol sik bilong ol pikinini, ol sik i save kalap wantaim binatang, helt menesmen sistem, medikal risets, klinikal

daagnosis na tritmen.

Bai i gat ol awod bilong laip membasip i go long sampla lain husat i givim bikpela helpim long wok bilong Medikal Sosaiti na long wok bilong ol yet long las 50 yia.

Medikal Sosaiti em i bodi i save makim maus bilong olgeta helt profesenel long PNG na em i wanpela olpela sosaiti stret long kantri, na wanpela bikpela wok em i save mekim em enuel medikal simposium.

Long taim em i stat long yia 1968, sosaiti i lukim namba bilong ol memba i save go antap winim 60 we em i bin stat wantaim na nau i gat 700 memba long kantri na ausait tu.

Simposium bai kamap long Mark Solomon Oditorium long Yunivesiti bilong Goroka em bai stat long 31 Ogas na pinis long Septemba 3.

Pm, Polye salens long 9milien dinau

I kam long pes 2...

Mista Polye long aste apinun i tok em bai mekim stetmen long tok klia long K9 bilien komitmen bilong gavman ausait long 2014 baset.

Mista O'Neill i tok i no gat wanpela komitmen bilong ol projek tasol em i tok ol toktok i kamap long gavman bai mekim ol bikpela projek olsem Pot Mosbi ples balus, Hailen Haiwe na ol arapela.

Taim Palamen i bung long aste, Mista Polye i kwiktai askim ol pialait kwesten long praim mnista, na opim ai bilong ol memba bilong

Palamen na ol pablik.

Praim Minista O'Neill i tok LNG projek bai puilim US\$30 bilien dola win mani insait long 20 yia, tasol kantri bai no kisim wanpela mani yet long 2014.

Em i tok taim gavman i wokim 2014 mani plen, i no bin putim win mani bilong LNG. Go insait Winmani bai stat kam insait long 2015 na i go antap.

Praim Minista i tok klia long dispela taim Mista Polye i askim tu praim minista long tok klia long win-

mani bilong LNG projek long dispela yia, 2014, 2015, 2016 na 2017.

Mista O'Neill i tok winmani bilong 2014 i no kam insait bikos gavman i wok yet long lo o bil bilong Soveren Wel Fan (SWF) long menesim winmani bilong LNG.

Em i tok klostu taim bai dispela bil i kam long Palamen, na gavman bai menesim LNG winmani aninit long SWF.

Praim Minista i tok klia olsem dinau na dinau resio bilong kantri i

stap aninit long Fiskel Responsibilit Ekt long 35 pesen. Em i tok kantri i no gat planti dinau long ausait olsem ol narapela kantri long wol.

Mista O'Neill i i tok Polye i bin stap minista bilong Tresari taim kantri i mekim mani plen na em i save gut long ol baset, tasol gavman i no go ausait na dinau planti olsem Mista Polye i tok planti taim.

Em i tok gavman i no brukim olget lo i bainisim ol dinau gavman bai kisim.

Mista O'Neill i tok planti ol foren

dinau em ol konsesenel lon we gavman bai bekim isi isi wantaim liklik winmani.

Em i tok gavman i no lukluk long ol komesel lon.

Gavman i wok long kisim dinau long Wol Benk, IMF, ADB na Exim Benk na iIC.

Moa long en, Mista O'Neill i tok gavman i gat inap mani long risev mani i stap long Benk bilong PNG long sapatim ol program bilong gavman i stap long baset.

Ogas 26 bai stap long kalenda bilong Palamen

Frieda Sila Kana i raitim

DE bilong Tanim bel na tok sori long God insait long PNG, Ogas 26 2014 i go daun long kalenda bilong haus Palamen olsem em i de bilong opim palamen wantaim kaikai wantaim ol sios na tu, long prea insait long semba.

Praim Minista Peter O'Neill i tok, taim O'Neill-Dion gavman i stap long pawa yet, olgeta yia Palamen bai kam long bung na beten na tok sori long God na tok tenkyu long ol planti blesing bilong em.

"Dispela em i wanpela spesel de long kalenda bilong PNG. Biknem na glori i go long Jisas Kraus long blesim yumi na lukautim yumi, stat long taim dispela kantri i makim dispela de 26 Ogas long 2007 i kam inap nau," Praim Minista O'Neill i tok.

"Pastaim praim minista na papa bilong nesen bilong yumi, Gren Sif, Sir Michael Somare i bin sainim tok promis olsem God bilong Israel bai kamap God bilong Papua Niugini. Na long 2011 mipela i sainim namba wan pepa long tokaut olsem dispela de em i pablik holide bilong beten," em i tok.

"Gavman i kolim yet nem bilong Bikpela long olgeta wok mipela i mekim. Wantaim God yumi ken kamapim gutpela Papua Niugini bilong tumora wantaim olgeta gutpela samting em i blesim yumi long en," Mista O'Neill i tok.

Yumi bihainim tok skul bilong ol Kristen Sios long pasin bilong Jisas Kraus na long gutpela wok bilong ol sios long givim sevis olsem edukesen, helt na long trenim ol pipel long kisim gutpela save.

Klostu 40 yia nau yumi stap olsem wanpela indipenden kantri na nau yumi mas kam wantaim na mekim wok. Ol pasto i bin askim long bung wantaim mipela. Tasol mipela long gavman tu i no bin tingim dispela de olsem prea de taim mipela i makim long Palamen bai kam bek gen long mun Julai.

"Em i taim bilong God na dispela de nau i stap long kalenda bilong Palamen. Mipela i mas kam na tingting na givim ona long God long olgeta gutpela samting em i save mekim long yumi. Patnasip bilong gavman wantaim sios em i trupela. Mipela i stat pinis long givim mani i go long ol sios long strongim wok bilong ol. Nau ol woklain bilong ol sios i stap long pe rol bilong gavman. I tru olsem long taim bipo gavman i no bin lukluk long dispela na kain taim olsem nau em sans long mipela lukluk i go bek na tok sori na lusim rong na go het long mekim gutpela wok," Praim Minista i tok.

Mista O'Neill i tok long laip bilong em yet, em i save bungim hevi stat long taim em i stap yet long bel bilong mama bilong em.

"Taim Pasto Michael Wilson i toktok long Joshua long katim wara Jordan taim em i gat tait wara, em i toktok long ol kain hevi mipela i bungim long dispela taim. Na mi ken tok dispela bai i no laspela taim. Em laip i save go olsem." Em i tok.

"Mi yet i bin bungim hevi kain olsem taim mi no kamap yet. Mama bilong mi em i yangpela tumas na em i kisim bel na em i wok long painim rot long kilim dispela bebi, olsem bai mi no ken kamap long dispela graun. Olsem na ol hevi i no nupela samting long mi," Mista O'Neill i tok.

Dispela kantri bai lukim bikpela, gutpela samting, tasol yumi mas putim ol mani bilong yumi i go long ol rait sekta na em bai bringim gutpela developmen. Olsem na mipela i wok long putim moa mani long edukesen na helt na infrastraksa.

Mi amamas long tokaut olsem, ripot bilong Yunaitet Nesen Populesen Fan (UNDP) i tokaut olsem developmen bilong PNG i wok long kamap gut nau.

"Olgeta yia bai mipela i gat kain bung long belo kaikai wantaim ol lida bilong sios na mi tenkyu long spika i redim dispela," Praim Minista O'Neill i tok.

Ol saveman bilong weda o klaimet i tok, El nino bai kamap long dispela taim, tasol long Tunde 26 Ogas de bilong prea na tanim bel bilong PNG, wanpela kain ren i pundaun long Pot Mosbi we i no pundaun strong tasol em i kamdaun isi, isi.

Ol pasto i go pas long dispela de i tok, dispela em i blesing na i no ren tru.

Ol Papua Niugini Baible Sios i bin go pas long lotu na prea program bilong Ogas 26 De bilong Tanim Bel na Pre we i bin kamap long Haus Palamen. Planti lain Kristen i bin kamap na sampela i gat sans long namba wan taim long go insait long Palamen Semba.

Em i trupela nupela de long PNG!



Olgeta lain i kamap long prea de wantaim PNG kala klos long soim strongpela wok bung wantaim bilong sios na gavman.

Poto: Frieda Sila Kana

mobile banking



Are you Registered?
Dial *131#

I can check my balance



I can transfer money to my wife



I can purchase credits for my mobile phone!



I can transfer money to my savings account



I purchase EasiPay Units at home



I don't need to go into a branch anymore



For more information

 320 1212 / 7030 1212 - 24/7

 servicebsp@bsp.com.pg

 www.bsp.com.pg  




Proudly supporting PNG and the Pacific

Nupela de long PNG

Frieda Sila Kana i raitim

PASIN bilong opim palamen miting long Papua Niugini i senis long dispela wik Tunde, taim Spika bilong Palamen, Theo Zurenuoc i larim 4-pela memba bilong Palamen i mekim prea long ol 4-pela rijon bilong kantri na tu long singautim wanpela wokman bilong God long pasim namba wan de kibung bilong haus wantaim prea.

Pasin bilong opim sindaun bilong Palamen em Spika tasol i save mekim prea bilong "Papa bilong Mipela," na ol i save go het long miting bilong ol. Tasol nau dispela wik long Tunde 26 Ogas, 2014 long de bilong PNG i tok sori na luksave long Tok Promis wantaim God bilong israel, Nesenel Palamen i lukim bikpela senis.

Pastaim spika bilong Palamen i singautim olgeta memba bilong Palamen na ol bos bilong ol dipat-

men na stetutori bodi long bung wantaim ol sios lida bilong Pot Mosbi na kantri long sindaun kaikai na prea wantaim insait long Stet Fansen rum long palamen. Na bihain ol i givim tok orait long ol pasto na ol Kristen manmeri long i go insait long semba na lukim ol memba i statim miting bilong ol.

Insait long belo bek kaikai wantaim ol sios lida Spika bilong Palamen na Memba bilong Finschafen, Theo Zibang Zurenuoc i daunim em yet na i tok, em i no ting olsem Palamen i bin mekim rong taim ol i bin makim Ogas 26 long singautim Palamen long kam bung, bikos dispela de em i de bilong PNG i tanim bel na tok sori long God.

"Mi save tru long spirit bilong mi olsem miting bilong Palamen long tude em God yet i bin makim pinis long de wan yet. Long 22 Julai 2014, God i bin kamap long Palamen bilong PNG. God i bin kam insait long ol wok bilong dispela



PM na Spika i prea long taim bilong belo kaikai. *Poto: Stanley Nondol*

kantri. God i bin kam insait long wok bilong Gavman bilong PNG," Spika Zurenuoc i tok.

"Mi bilip tru long bel bilong mi

olsem mak bilong save na bilip long yumi long wok blong God na wanem samting yumi laikim long God Bikpela, na singaut bilong God

long yupela olsem ol lida bilong dispela kantri, yupela i no ken kusai na i no kam insait long ol samting i kamap long dispela de," em i tok. No ken tingting planti bikos i gat wanpela bikpela pawa nau i wok long nesen bilong yumi tude," Mista Zurenuoc i tok.

Mista Zurenuoc i tokim praim minista olsem, em i wanpela bilip man olsem na em i save olsem Bikpela yet i makim rot bilong dispela kantri long kamap olsem wanpela piksa bilong Kingdom nesen long wol, olsem na em yet bai mekim kamap.

"Na sapos Bikpela i laik mekim samting, ol pipel i mas holim pas dispela samting. Yu na ol lida bilong yu na pipel bilong yu i kisim pinis wanem samting God i laik mekim insait long bel bilong yupela na givim em spes insait long demokrasi bilong kantri em Palamen," Mista Zurenuoc i tok.

Boreboa Praimeri kisim kompyuta long Gavana Parkop

OL sumatin bilong Boreboa Praimeri skul insait long Nesenel Kapitel Distrik bai gat gutpela sans long save long yusim ol kompyuta long mekim ol skul wok bilong ol.

Dispela bai kamap wantaim helpim bilong Gavana bilong NCD, Powes Parkop husat i makim dispela skul olsem pailot projek long kompyuta program bilong em.

Long dispela wik, Mista Parkop i bin lon-sim kompyuta projek bilong em na givim 10-pela nupela

kompyuta i go long skul we ol i putim long nupela Infomesen Teknoloji leboretori o bilding skul i sanapim na opim nupela tasol.

Long 43 praimeris skul we bai kisim ol kompyuta, Boreboa em i namba wan skul long kisim ol kompyuta na tu, ol bai yusim dispela skul olsem pailot projek long kompyuta program bilong Gavana Parkop.

Aninit long kompyuta program pailot projek, ol bai ranim ol kompyuta klas long ol sumatin na ol dispela tisa i no save yet long yusim

kompyuta.

Gavana Parkop i tok sapos dispela projek i ran gut long Boreboa Praimeri, ol bai kisim i go long ol narapela praimeris skul.

Boreboa Praimeri i bin wet long tupela yia long kisim ol kompyuta na Gavana Parkop i amamas long ol stap isi na wet inap nau.

Skul i mekim wanpela klasrum olsem IT bilding na ol i strongim sekyuriti pastaim Mista Parkop i givim 10-pela kompyuta i go long ol.

Gavana Parkop i bin tokim ol sumatin olsem

nau ol i gat ol kompyuta, ol i mas lainim olgeta samting long save long yusim, na yusim intanel long stadi na mekim ol risets wok.

Gavana Parkop i tok long wol tude, kompyuta em dispela samting we olgeta manmeri i kisim ol samting i kamap long wol tude.

Na gol bilong en em long olgeta skul long NCD stat long elementeri i go antap i mas save long yusim kompyuta pastaim long 2017 nesenel ileksen.



Sir Michael Ogio wantaim peint bras.

GG helpim long klinim ples

GAVANA Jenerel Gren Sif Michael Ogio i bin kisim sampela taim aut long wok bilong em long dispela wik long helpim long klinim nupela gavman haus we bai op long neks mun.

Gavana Jenerel Ogio i bin rausim opisal klos bilong em na wearim sotpela trausis na t-siot long taim em i wok long klinim

ples. Sir Michael i bin kisim peint bras na peitim ol wol tu.

Ol wok manmeri bilong gavman haus i bin go pas long kamapim dispela wok bilong klinim ples.

Olsem wanpela bikpela haus long kantri, ol i mas soim gutpela eksampol long helpim long mekim envaironmen helti na klin.



SAVE STAP LONG KOMPYUTA: Gavana Powes Parkop i yusim kompyuta taim ol tisa na sumatin bilong Boreboa Praimeri skul i lukluk i stap. Ol i amamas long kisim ol 10-pela nupela kompyuta long gavana. *Poto: NCD Midia*

Ren pundaun i givim blesing long Karkar ailan

James G. Kilai raitim

REN i stat pundaun long dispela wik long Karkar Ailan i givim gupela blesing stret long planti ruel pipel.

Longpela taim bilong san na no gat ren i pundaun i wok long givim hat taim long planti pipel nau long Karkar Ailan insait long Sumkar distrik long Madang provins long samting olsem 4-pela mun olgeta.

Planti ples long Karkar Ailan i wok long kisim traime stret bikos ren i no pundaun klostu moa long tupela mun na longpela taim bilong san i mekim ol tenk na ol dram wara ol pipel i save kisim wara long yusim helpim sindaun

bilong ol long ples i drai.

Wantok Niuspepa i bin bungim sampela lain manmeri blong Komoria viles husat bungim hat tru long painim wara long kukim kaikai, wasim klos na waswas. Ol i bin wokabaut long longpela hap tru long painim wara.

Ol tisa long Kalik Praimeri skul wantaim ol famlli long Komoroa 2 i save wokabaut longpela rot tru long painim wara long yusim.

Ol i save karim ol bikpela plastik kontena na wokabaut i go painim wara long ol liklik ston wara i kam daun long maunten.

Ol i save kisim samting olsem 30-minit long wokabaut i go long dispel ples long kisim wara, na bihain ol i pulumapim pinis, ol i

save karim ol hevi kontena wara na wokabaut i go bek long skul long kukim kaikai.

Sampela viles tasol long Karkar we i stap antap klostu long maunten paia i gat ol bikpela wara i stap.

Ol dispela ples we i gat bikpela wara i stap long en em long Gamog, Boroman na tu sampela hap we riva i ron em long Rasi long nambis.

Ol lain i gat kar na ol lain i stap klostu long dispela hap i laki bikos wara i ron yet, tasol planti i wok long tingting planti yet sapos bikpela taim bilong san i go het yet em dispela wara i ken drai. Wankain i bin kamap long yia 1997 we i lukim longpela taim bilong san na planti ol baret wara na riva long ailan i bin drai olgeta.



Sinia tisa bilong Kalik praimer skul long Komoria viles, David Setu i painim baret wara long waswas na pulumapim. Foto: James G. Kila

Wok redi long wokim kamap nupela polis bareks long Madang

Asisten Polis Komisina Edministren, Awan Sete i bin mekim lukluk raun i no long taim i go pinis long Madang long stretim toktok long graun wok i kamap long kontraksen bilong tupela nupela polis bareks long Madang bilong ol polis manmeri.

Komisina Sete i bin bungim ol

lain projek menesa bilong tupela projek wok na tu Madang Provinsal Polis Komanda (PPC), Suprintenden Sylvester Kalaut long mekim fainel toktok long dispela tupela bikpela projek we bai kamap long Madang provins.

PPC Kalaut i tokim ol nius lain long Madang olsem 30 yunits bai ol

i wokim long Bilia maus rot eria long not kos rot klostu long Madang taun.

Mista Kalaut i tokaut tu olsem narapela bareks long Madang em ol bai wokim long not kos rot tu arere long olpela Siar plentesen we i stap arere long RD Tuna Fektor. Dispela bareks bai i gat 26 yunit olgeta.

Madang PPC i tokaut olsem wok kontraksen bai stat bihain long tenda i go aut.

Hevi bilong polisman meri i no gat gupela haus em bikpela stret long Madang provins. Ripot long pastaim i tok olsem planti ol yangpela polisman meri i no gat haus long go mekim wok long Madang taun na nau wok i stap long Ramu

Suga stesin.

Helt Dipatmen i bin pasim olpela polis bareks long stat bilong 2000 bihain long ol haus i bagarap tru na i no gupela long ol polisman meri na famili bilong ol i stap long en.

Komisina Sete i bin go long Wewak tu long stretim wankain toktok long wokim kamap nupela polis bareks long Is Sepik provins.

Australia Gavman helpim planti skul long PNG

OL nupela klasrum i redi long helpim ol sumatin bilong Okapa distrik long Isten Hailans provins i sindaun gut na lainim gut ol samting long klas.

Dokta Alpers Memoriel Skul i gat nupela dabol klasrum, opis, haus bilong ol tisa, toilet bilong ol bois na gels na wara tenk bilong skul.

Dispela em wanpela longwe bus skul na ol i laki tru long gat kain nupela senis olsem long skul bilong ol we ol i amamas tru long kisim, Het Tisa Oma Koka i tok. Dispela helpim i kam long helpim bilong Australia Gavman.

Tru tumas dispela em blesing long ol sumatin long Ivingoi komyuniti long kisim dispela presen i kam long Australia, Mista Koka i tok.

Dokta Alpers Memoriel Skul i gat olsem 430 sumatin we 185 em ol skul meri.


Australia i helpim long opim dua long olgeta pikinini i ken kisim gupela edukesen we em bin wokim olsem 1100 klasrum pinis. Planti bilong ol dispela klasrum em long ol ples eria. Planti i gat ol samting olsem toilet blok we i gat wara na i ken helpim ol pikinini meri long stap long skul eria na skul gut.

Provinsal mausman bilong Australian Hai Komisin Freddy Hombuhanje i tok olgeta pikinini, bikpela tru em ol pikinini meri na ol husat i turangu lain (disebel) i gat rait long kisim gupela edukesen.

Olsem na Australia i wok long sapotim ol nupela bilding long ol skul olsem dispela long Dokta Alpers Memoriel Skul. Mipela laik helpim Papua Niugini long kisim gupela edukesen, Mista hombuhanje i tok.

Em i mekim bikpela tok amamas long komyuniti na ol skul bod long gupela sapot na wok bung wantaim bilong ol long kamapim ol dispela samting long skul.

"Mipela i tok amamas tu go long Isten Hailans Provinsal Gavman, Edukesen Divisen na lokol level gavman long bikpela hat wok bilong ol tu.



Nesenel Literesi Wik i kamap gen long Septemba 8 igo Septemba 12 na wanpela taim gen ExxonMobil i wok bung wantaim Nesenel Literesi Seketeriet long kamapim sampela naispela samting. Edukesen em i astingting bilong ol wok na arapela samting ExxonMobil Papua Niugini i kamapim insait long ol komyuniti. Na mipela i kamapim planti program long promotim edukesen olsem wanpela bikpela samting long helpim ol komyuniti i gro na develop. Het tok bilong Nesenel Literesi Wik long dispela yia em, "Literesei - Ki bilong Wol bilong yu," em i pas wantaim ol praloriti bilong mipela long kamapim gut literesi, o pasin bilong rit na rait na edukesen.

Inap foapela yia nau, mipela i wok bung wantaim planti lain na putim mani long literesi na edukesen long givim moa sans long ol pikinini long amamas long ritim buk, na moa yet, long taim ol i ritim ol buk bilong Papua Niugini. I no gat planti buk i stori bilong planti kalsa bilong Papua Niugini, ol pipel i save harim ol dispela stori long maus tasol. Olsem na mipela i bin sponsa long kamapim sampela Papua Niugini buk bilong ol pikinini.

Wanpela bilong ol dispela buk em ol Toea piksa stori buk bilong wanpela gupela pikinini man, nem bilong em Toea. Em i raun i go long kain kain ples long kantri na kisim save long kalsa bilong Papua Niugini. Toea maskot i bin raun tu long planti skul long Projek eria long givimaut ol buk na tokaut long ol gupela tok save, wanpela bilong ol em i pikinini i mas stap long skul na kisim gupela edukesen.

Wanpela narapela buk mipela i bin sapotim wantaim helpim bilong University of Canberra em dispela buk ol i kolim, *The Adventures of Piggy on the Kikori River* we i gat stori bilong Piku wanpela pik-nus trausel (pig-nose turtle). Dispela buk i traime long skulim ol pikinini na komyuniti long Kikori eria long lukautim gut dispela trausel na spesel ples we em i save stap long en. Ol i salim dispela buk nau long stua bilong Port Moresby Nature Park. Mani ol i kisim long dispela buk bai i go long edukesen bilong ol pikinini husat i stap long ol komyuniti i mekim wok bilong lukautim dispela konsevesen program bilong Piku.

I no longtaim i go pinis, mipela i putimaut Kastom Stori - Sene Gori buk. Dispela buk i gat ol stori tumbuna na piksa i kam moa long 3,700 pikinini bilong 26 skul long Projek eria husat i bin stap insait long wanpela kompetisen bilong raitim ol stori. Mipela i bin askim ol studen long sindaun wantaim ol lapun na harim stori bilong ol, na bihain ol i raitim stori na droim piksa. Ol i bungim ol dispela stori i bin win na kamapim wanpela buk na nau dispela buk i stap long ol skul na laibri.

Wanpela mun i go pinis, mi bin amamas long ritim ol stori bilong dispela buk Kastom Stori - Sene Gori, i go long ol pikinini long Buk bilong Pikinini laibri long Yunivesiti bilong Papua Niugini long Pot Mosbi. Pes bilong ol pikinini i bin lait long taim ol i harim wanem samting i kamap insait long ol dispela stori. Ol buk i bikpela samting bilong givim gupela stia na save na i ken kamapim gupela save long ol pikinini. Buk i givim save na long wankain taim tu, i ken kamapim gupela laip bilong ol na mekim ol i hangre long kisim moa save.

Mipela i bilip olsem long taim yu putim buk long han bilong pikinini, yu opim wanpela nupela wol long laip bilong em. Mipela i luksave olsem velu bilong edukesen em i as bilong givim save long ol komyuniti. Olsem na bai yu ritim wanpela buk long wanpela pikinini long Nesenel Literesi Wik tu o nogat?

Gupela de!

Mi laik save long tingting bilong yu, na wanem samting yu laik ritim long dispela kolum, plis salim email i kam long pnglngproject@exxonmobil.com o lukim mipela long www.pnglng.com

Steamship Treding helpim misin sip



Ol memba bilong White Cane Ben bilong St. John Ambulens Senta bilong ol ai pas lain i singim song bilong stopim 'tetanus' long taim bilong opim Nesenel Helt Wik long Gerehu, NCD.

Ol patna i sapotim tetanus banis sut

Frieda Sila Kana i raitim

PNG Nesenel Helt Dipatmen i laik sanap wantaim Wol Helt Ogenaisesen (WHO) na Yunaitet Nesen Fan bilong ol Pikinini (UNICEF) long stopim binatang bilong sik tetanus long ol mama na ol bebi.

Man i go pas long WHO, Dokta Pieter Van Maaren i tok em i amamas long tok olsem insait long ol bikpela na develop kantri, i no gat planti bebi na mama i dai long binatang bilong tetanus. Tasol long ol liklik kantri i wok long kirap yet, dispela hevi i bikpela yet bikos ol meri i save karim bebi long ol hap we i no stap long gutpela haus sik o klinpela eria.

Yunaitet Nesen (UN) i makim 2015 long rausim tetanus binatang olgeta

long wol. Olsem na PNG ogenaisesen i wok strong long bringim marasin bilong banis sut bilong tetanus i go long olgeta hap bilong kantri we i gat ol helt senta, haus sik o klinik i stap long en.

I gat 31 kantri long wol i kamap pinis long mak bilong givim banis sut long olgeta bebi, yangpela meri na ol bikpela meri long mak bilong 45 krismas. Papua Niugini wantaim 3-pela narapela kantri long Westen Pasifik i no kamap long dispela mak yet.

"Helt Dipatmen i laik bringim dispela sevis na mi tok strong long ol meri na pikinini i mas kisim dispela marasin ol i givim nating na banisim ol yet. Mi laikim ol helt woka tu i mas givim gutpela sevis long ol siklain i kam long kisim

marasin," Dokta Van Maaren i tok.

Helt Minista, Michael Malabag i tok, long 2012 na 2013 i bin gat tripela raun vaksinesen kempein i kamap bilong ol yangpela meri na ol mama i ken kisim tetanus banis sut. Tasol dispela kempein i no bin pinis gut bikos ol provinsel patna i no bin wok gut long sapotim dispela.

Em inap long olgeta pikinini aninit long 5-pela krismas i ken kisim dispela banis sut sapos i bin wok gut long dispela taim. Ating dispela inap long stopim kamap bilong sik misels yumi bin lukim long ol mun na yia i go pinis.

Minista Malabag i singaut long olgeta yangpela gel na ol meri long go nau long ol haus sik na klinik klostu long ol na kisim Tetanus toksoid banis sut.

LONG Fraide 22 Ogas, Jeneral Menesa bilong Kopret Afeas bilong Steamship, David Toua i bin givim K400,000 sek i go long Komyuniti Developmen Menesa bilong Medikal Sip bilong Yut Wit A Misin (YWAM), Dokta Sarah Dunn, antap long sip MV Pacific Link long basis bilong Steamship insait long Pot Mosbi.

Steamship i helpim YWAM long mekim wok i go insait long ol rurel eria long bringim besik helt sevis long ol pipel bilong Galp, Westen na Oro Provins.

Mista Toua i tok, em i autim bikpela tok tenkyu long ol YWAM long gutpela wok ol i mekim long ol bus ples bilong Papua Niugini we no gat ol gavman sevis i go long ol.

"Steamship i stat long sapotim YWAM long 2012 wantaim K400,000 na em i mekim wankain yet long ol yia i kam

bihain, olsem nau long 2014. Na i no dispela tasol, nogat. Bisnis bilong mipela olsem Kostal Siping tu i save givim wanpela hap bilong bikpela bris bilong solwara long sip bilong YWAM bai stap nating long taim ol i kam bek long Mosbi," Mista Toua i tok.

Em i tok, ol rurel ples i save nidim tru ol helt sevis na ol YWAM i go pinis long ol ples we ol pipel i save wokabout, long longpela rot tasol o pul long kanu long longpela hap long kisim helpim long wanpela haus sik o klinik.

"Bikpela toktok bilong YWAM em, 'Mi laik stap laip' na dispela em i trupela krai bilong ol pipel long ol ples long bus. Ol i laikim tasol besik helt sevis inap long ol i ken stap laip na autris program bilong YWAM em i mekim dispela krai bilong ol i karim kaikai," Mista Toua i tok.

Long bekim patnasip bilong Steamship, YWAM i larim ol

woklain bilong ol long sekim ol tit na stretim, taim ol i mekim autris program long Pot Mosbi.

"Mipela i laikim ol woklain bilong mipela i helpim long ol komyuniti developmen program, olsem ol volantia woka, o long kisim helpim wantaim ol program bilong ol. Mipela laikim ol i pilim olsem ol i hap bilong dispela ol program tu," em i tok.

Long dispela yia, Steamship i patna wantaim Buk Bilong Pikinini long ol woklain bilong en i wok volantia wantaim BbP stretim buk program. Ol woklain i bin kamapim tu wanpela program ol i kolim, "Go antap long daunim kensa", Maun Wilhelm Salens long kamapim mani bilong mamogram ikwipmen long Pot Mosbi Jeneral Haus sik, na tu long komisenim narapela mammogram masin long Madang.

Mamogram em i masin bilong sekim kensa binatang long susu bilong ol mama.

ANZ senia meri long bisnis midia network

ANZ nau i kamapim wanpela nupela program, "Notebel Wimen" bilong strongim ol senia meri long wok bilong ol insait long bisnis pres, sosel midia na insait long ol network bilong bisnis long helpim long daunim wari bilong ol meri long bisnis i no go bikpela hariap.

'Notebel Wimen' program bai helpim ol senia meri insait long ANZ bank long kisim sampela skul na sapot long helpim ol long save moa long wok wantaim ol midia insait long ol network bilong bisnis bilong ol na long ol narapela bikpela taim.

ANZ CEO Mike Smith i tok, "I gat planti meri husat i gat save long mekim planti samting insait long bisnis komyuniti, na ol i ken givim moa long komyuniti tasol ol i no kamaut long ol manmeri bai

harim ol. Notebel Wimen program em i wok mipela long ANZ i laik mekim long helpim ol senia meri long bisnis bilong mipela long kirapim strong tingting bilong ol long kamapim ol yet ples klia."

Elizabeth Broderick, Federal Seks Diskriminasion Komisina bilong Australia i tok, "Em i bikpela samting tru long ol meri i mas kamap ples klia insait long kantri na ausait. Taim nek na nem bilong ol meri i hait long bisnis midia na long bikpela bisnis komyuniti, em i no gutpela tumas na i gat bikpela pret long dispela."

Amanda Gome, bos bilong ANZ Dijital na Sosel Midia na meri i kamapim Notebel Wimen program i tok, "Mipela i mas wok hariap. Bisnis midia wanpela i no inap long helpim ol meri long makim ol yet.

Mipela i laikim olgeta bisnis komyuniti i mas putim han wantaim ol meri long kirapim dispela program."

ANZ BlueNotes Menesing Edita, Andrew Cornell i bin go pas long wanpela kibung long las wik long dibet o tok resis long save em i asua bilong husat na ol meri i sot long bisnis midia, ol man o meri i asua.

Tok resis i soim, Siameri bilong Wimen Lidasip institut bilong Australia, Carol Schwartz, na Elizabeth Broderick i toktok olsem em i asua bilong ol man. Senia kolum raita bilong Australian Fainensel Riviu Mike Smith na Amanda Gome bilong ANZ' bai toktok olsem ol meri yet i mas kirap na mekim samting. Ol toktok bilong ol bai kamap long niusleta, ANZ BlueNotes long www.bluenotes.anz.com.



Jeneral Menesa bilong Kopret Afeas bilong Steamship Treding Kampani, David Toua i holim piksa bilong K400,000 sek wantaim Komyuniti Developmen Menesa bilong YWAM Sip, Dokta Sarah Dunn na tupela i sanap wantaim ol woklain bilong sip na STC. Poto: Frieda Sila Kana

Operesen Pasifik Yuniti

WANPELA Eafos tim bilong I Amerika o Yunaitet Stes (US) nau i stap nau long PNG long karimaut Operesen Pasifik Yuniti, wanpela enjinia projek wantaim PNG ami.

Operesen bai stap inap long Septemba.

Dispela Yuniti Misin long Pasifik i kam long sanapim tupela haus slip bilong ol meri sumatin bilong Togoba intamidiet Skul long Hagen. Insait long dispela projek, ol soldia bai brukim na rausim tupela olpela haus slip, stretim graun gen na kirapim tupela nupela haus slip bilding.

Togoba Skul em i pulap tru na i no gat moa spes olsem na planti handret sumatin i no inap long go insait. Em i ples klia olsem i gat bikpela nid long ol pikinini meri i mas kisim intamidiet edukesen insait long eria bilong sentral hailans.



Ol meri U.S Eafos soldia i wok kamda long kirapim haus slip bilong ol meri sumatin long Hagen. Poto na stori: PNG, U.S. Embesi

Stori bilong PIH

Lukluk long bihain taim:

PIH i laik kamap namba wan haus sik long PNG na Saut Pasifik rijon. Nau PIH i winim wanpela bid long stretim gen haus sik na kisim wanpela 80 bet multi-speselti, teseri kea haus sik long Pot Mosbi, olsem publik na praivet i wok wantaim long kamapim gutpela wok bung bilong bringim nam-bawan helt sevis long kantri.

Long namba wan hap bilong dispela plen long Oktoba 9, 2012 PIH i bin kamapim wanpela Speselis Klinik long autpeisen wing long Taurama, Pot Mosbi, na em i gat 11 konsalten klinik wantaim hap bilong kisim ol tes, tritmen rum, na rediodiagnostik sevis wantaim CT Sken na Dijitel Xrei.

Long Oktoba 22, 2012, PIH i bin holim wanpela bung bilong selebretim dispela na Praim Minista Peter O'Neill na Minista bilong Helt na HIV, Michael Malabag i givim tok amamas long PIH long dispela bikpela samting em i mekim na ol i tok bai ol i sapotim dispela wok bisnis olsem wanpela praivet publik patnasip (PPP).

PIH nau i wok long ranim wanpela pri sevei bilong ISO 9001:2008 setifikesen. Olgeta sistem na wok i bihainim ol gutpela kain stail bilong ol medikal wok na akreditesen gaidlain. Las setifikesen odit bai kamap klostu nau, insait long yia 2014 bihain tasol long nupela menesmen na infomesen sofwea bilong haus sik i kamaut.

Niu PIH (em bai wankain nem tu long nupela 80-bet Pasifik Intenesenel haus sik) i op long mun Novemba 2014. Dispela haus sik bai kamap olsem wanpela haus sik long ovasis tasol em i stap long PNG yet. Em i gat moa long 8,000 skwea mita, na Niu PIH em i wok nau. Em i gat mak long mekim gutpela wok olsem wanpela praivet haus sik na em bai gat olgeta kain helt kea nau ol praivet klinik long kantri i save givim.

Dispela nambawan haus sik i gat spes bilong holim 150 bet. Tasol long stat bai em i kisim tok oraif taim holim 80-bet long lukautim teseri kea na bai bringim speselis klinik na daiognistik sevis, nau i no gat long PNG. Em bai holim namba wan Cardiac Catheterization lab, Cardiac sejikal tieta na MRI long kamapim moa gutpela pasiliti o ples bilong wokim cardiac na Neurosciences.



Pacific International Hospital
Stores Road, Next to 4-Mile PMV Stop,
P.O. Box 6103, Boroko, NCD,
Ph:(675) 323 4400 Fax: (675) 323 4600

Vision City PIH Clinic
Near the underground entrance
Mob: 7100 2873
343 1582 - Landline

PIH Specialist Clinic- 3 Mile
Ph: 311 3000/311 2888/ 310 7333

Hevi yumi inap long stopim

Sapos bel mama i sot long blut em i ken isi long painim hevi

Dia Dokta

DR MATHIAS SAPURI, OL MBBS, DRACOG, DRACGP, DGO, MMEDO&G, CertFP, CertDU, CertNSV, MAMEWPR, MWFME, FACRRM, FACTM

Dia Rida,

Bikpela namba bilong ol bel mama long Papua Niugini i save sot long blut.

I gat 40 pesen bilong ol meri i stap long ol taun bilong yumi, 60 pesen bilong ol ruel mama na 15 pesen bilong ol woklain o husat i gat edukesen na i wok long taun i kisim bel i save sot long blut. Dispela i min olsem PNG i gat bikpela hevi long ol mama i sot long blut na dispela bai givim hevi long ol bebi tu.

Long taim mama i bel na em i sot long blut, hemoglobin bilong em i daunbilo long 10.0 mg pesen long mak bilong Wol Helt Ogenaisesen (WHO). Hemoglobin em i wanpela liklik hap bilong blut i save karim gutpela win i go long olgeta hap bilong bodi long mekim bodi i wok gut. Taim i no gat gutpela win long bodi em ol hap bilong bodi insait i save dai na bodi bai i no inap long mekim olgeta wok bilong en gut.

Taim blut bilong mama bel i sot em yet bai hat long luksave. Olsem na olgeta mama i gat bel i mas kisim tes bilong hemoglobin long namba wan taim ol i kamap long klinik bilong ol mama. .

Taim mama i sot liklik long blut, yu ken luksave long nus na pes bilong em i slek na han bilong em na tu mama bai komplem long skin les na i sotwin taim em i wokabaut.

Taim hemoglobin tes i soim olsem mama i no gat inap blut, ol helt woka i mas traim long painim aut wanem as bilong dispela. Wantaim sampela moa tes ol bai mekim. i gat plant rot bilong blut i ken sot. Mi bai autim sampela insait long dispela toktok bilong mi.

Plantu mama bel i save sot long blut bikos long ol blut i bung long holim bilum bilong bebi na blut bilong mama yet i go liklik. Tasol dispela i save kamap gutpela gen na i no gat birua long mama taim em i gat bel yet.

Long PNG, samting i save kamapim sot long blut long



Wantok fail foto

mama bel em: kaikai bilong mama i no gat inap ain na folik asid, malaria, strongpela kain sik i save stap longpela taim, snek long bel rop. Dispela i save kamap sapos mama i karim bebi klostu tumas na i no kisim gutpela kaikai.

Tasol sori tru olsem 730 meri long olgeta 100,000 mama long PNG i save dai long taim ol i karim bebi bikos blut bilong ol i pinis o sot.

Em i isi long stretim; mama i mas kisim fifol tablet olgeta wan wan de long strongim ain na folik asid bilong strongim hemoglobin straksa bilong em.

Em i minim wanem long mama bel insait long PNG? Olgeta mama bel i mas gat wanpela mak bilong hemoglobin long taim ol i go long klinik na wan wan de ol i mas kisim wanpela fifol tablet, ol i mas pinisim malaria marasin bilong ol long tripela de Klorokwin, kisim tupela tablet Albendazol long wanpela taim tasol.

Long stopim malaria ol mama i mas slip insait long taunam o i gat marasin sapos long ruel eria na arere long taun.

Plantu meri i stap long taun i save stap long gutpela haus i gat flai waia na ol i no save laik long kisim klorokwin tumas bikos malaria bai i no kisim ol na hevi bilong Klorokwin Teratojen bai i ken bagarapim ai bilong bebi tu. Tasol yu mas lukim dokta hariap sapos yu pilim olsem sik malaria

i kisim yu.

Mama bel i mas kisim narapela sekap gen long taim em i kisim 28 wik bilong em n alas tes long taim em i gat 36 wik pastaim long em i karim bebi.

Sot long blut taim mama i bel em i gat ol kain hevi i ken kamap olsem mama lusim bebi na lusim blut inap em i ken dai tu.

Wanpela stadi Dokta Surinder Kaul i wokim i strongim tok gen olsem long PNG plantu dai bilong ol mama long taim bilong karim bebi o taim ol i gat bel em i save kamap long taim ol i sot olgeta long blut o i no gat inap blut long bodi bilong ol.

Mama i ken dai bihain long em i karim bebi na lusim blut, o long taim bilong karim na bilum bilong bebi i no kamaut gut, o rot bilong karim i pas, sampela binatang bilong sik i kam insait long taim bilong karim, kisim malaria, bebi i no slip gut, mama karim plantu bebi tumas klostu, no gat famili plening, no gat gutpela kaikai na mama i no skul gut.

Ol dispela hevi bungim wantaim hevi bilong i no gat gutpela helt sevis na i no gat gutpela rot trenspot long ol ruel ples i save kamapim dai.

Ol PNG i mas plenim hamas pikinini ol i laikim. Ol i mas skelim sapos ol i gat inap mani long mama na pikinini kaikai gut na i mas gat gutpela rot na gutpela helt sevis.

Lukautim gut mani bilong famili

na mama i mas gat gutpela kaikai bilong helpim blut taim em i gat bel. Em i mas kisim gutpela sapot long bodi, tingting na spirit bilong em inap long taim em i karim bebi.

Mama i mas toktok wantaim dokta o helt woka long plen bilong taim em i gat bel. Em i mas go long haus sik long taim bilong klinik bihainim tok bilong dokta na helt woka.

Gutpela taim em 6 o 8 wik long go i kam long haus sik long sekap. Ol mama i gat hevi long bel i save kisim toksave long go i kam plantu taim moa long sekap.

Long PIH mipela i gat gutpela mekpas bilong ol sevis mipela i ken givim long ol mama bel we inap long mak bilong mani bilong ol. Mipela i gat 8-pela konsalten dokta wantaim Dokta bilong ol meri na ol nes husat i gat bikpela save na ekspirien long helpim mama long karim bebi, wok bilong sekim blut i stap, alra saun sken bai ol i ken kisim tupela taim na bai i gat kaunseling pastaim long karim na bihain long karim bebi, ekksesais klas, skul bilong kaikai na nutrisen.

Famili i mas redim mani long eni taim imejensi bai ol i ken ran hariap go long haus sik olsem hap bilong plen bilong karim bebi.

■ Mathias Sapuri, OL – Senia Dokta bilong ol meri i stap long Pasifik Intenesenel Haus sik; em i stap Presiden bilong Medikal Sosaiti bilong PNG pastaim; na pastaim Siaman bilong Medikal Bod bilong PNG; Pastaim Din bilong UPNG Medikal Skul na Deputi Siaman bilong Pasifik Intenesenel haus sik.

sapuri@daltron.com.pg

DISCLAIMER

"The medical information in this article is provided as an information resource only, and is not to be used or relied on for any diagnostic or treatment purposes. This information is not intended to be patient education, does not create any patient-physician relationship, and should not be used as a substitute for professional diagnosis and treatment. Please consult your health provider"

Tenkyu long Sony bilong Vanimo, Thomas bilong Maun Hagen na Jon bilong Kimbe long salim 'sms' i kam long mipela long las wik.

"Nau sapos yu gat pen o hevi long narapela hap bilong bodi, salim teks i kam na dokta bilong PIH bai i ken traim bekim wari bilong yu insait long Wantok niuspepa narapela taim gen.

" Menesmen na wokmanmeri bilong Pacific International Hospital i laik bung na tok amamas long Medical Society ov Papua New Guinea long 50th Annual Medical Symposium na 50th Anivesari, bai kamap long Goroka long 31 Ogas i go Septemba 3 dispela yia. "

Plis no ken ring i kam, salim teks tasol i kam long digicel namba 7155 8866 na givim nem na adres yu teks long en.

No gut bai yu winim wanpela prais!

Ramu NiCo givim kontrak na bisnis long KBK papagraun

NAMBA wan nikel na kobalt main kampani long PNG, Ramu NiCo (MCC) bai go het yet long givim ol kontrak wok aninit long projek memorandum ov agrimen (MOA) na tu givim bisnis na wok long ol papagraun.

Kampani bai go het long mekim dispela maski olsem em i bungim bikpela birua long Ogas 4 we i lukim kampani lusim moa US\$5.06 milien (K13 milien).

Presiden bilong Ramu NiCo, Wang Jicheng i tokaut long dispela long Mande, Ogas 18 taim Kampani i givim tripela kontrak wok long ol Kurumbukari papagraun. Ol kontrak ya em long rot mentenens na wanpela em bilong kesual wok.

Long taim bilong sainim kontrak, Mista Wang i tok klia olsem dispela ol bisnis kontrak em bilong longpela taim helpim bilong ol papagraun, na em i no kamap nau tasol bilong long birua kampani i bungim long Ogas 4.

"Ol helpim mipela bai givim

aninit long MOA bai go het yet na mipela amamas na sanap strong long givim moa kontrak taim mipela i lukim olsem fainens bilong mipela i orait,"Mista Wang i tok.

Papagraun kampani bilong Kurumbukari, KBK Limited long Mande i sainim agrimen na i kisim kontrak long stretim rot makim ol papagraun.

Dispela rot mentenens kontrak bai ol i KBK Limited mekim wok long Ramu Nikel Bris i go olsem Nu Kemp eria we mani mak blong wok em moa long K400,000. Narapela rot mentenens wok em long Sauten Kros Tenk klostu long KBK Main pit i go long Kinimati viles, we mani mak bilong kontrak em K300,000.

Narapela kontrak bilong ol papagraun i wokim kesual wok em K32,000.

Mista Wang i sainim agrimen wantaim Jenerel Menesa bilong KBK Limited, John Opotio.

Dispela rot mentenens kontral

stat long Ramu Nikel Bris i go long Sek Poin arere long Nu Kem em 8.8 kilomita na, narapela 4.3 kilomita em long Ovahet Tenk i go long Kinimati viles.

Ol dispela rot mentenens wok insait long main ekse rot, tasol ol lokol papagraun tu i save yusim rot.

Tupela rot kontrak em bilong wanpela yia, tasol i ken go het sapos gutpela wok i kamap wantaim gutpela ripot. Insait long agrimen, wok bai stat klostu taim.

Kesual wok kontrak Ramu NiCo i givim bai lukim 10-pela lokol lain i go wok wantaim KBK Limited long mekim ol liklik wok aninit long eria bilong ol.

Siaman bilong KBK Lenona Asosesin, Mathew Denguo i tok tenkyu long Ramu NiCo (MCC) long givim dispela ol kontrak na i tokaut olsem ol bai givim wok mak bilong na traim hat long kamapim gutpela wok na pinisim wok long taim stret.



Jenerel Menesa bilong KBK Limited, John Opotio i sainim kontrak wantaim Presiden bilong Ramu NiCo Wang Jicheng.

Westpac sapotim 2014 Kenu na Kundu festival

OLSEM wanpela namba wan benk insait long kantri, Westpac i amamas long tokaut olsem ol bai helpim gen long sapotim Milen Be Provinsal Turisim long kamapim Kenu na Kundu festival.

Dispela yia em i namba 11 taim bilong dispela festival long kamap long Alotau long mun Novemba, na Westpac i givim K15, 000 long sapotim.

Bos man bilong ritel benking bilong Westpac long PNG, Adam Downie i amamas gen long sapotim dispela festival bikos ol i lukim olsem em i bin kamap gut tru long las yia.

"Mipela i amamas long sapotim dispela festival bikos em i wanpela nesenel festival. Mipela i bilip olsem sapot bilong mipela bai helpim ol kastoma bilong mipela, ol pipel na ol komyuniti.

"Sapot bilong mipela bai givim helpim long ol turis husat i kam long ol arapela kantri tu," Mista Downie i tok.

Menesing Dairekta bilong Westpac PNG, Geoff Toone, i tok pasin long lukautim ol kalsa bilong ol pipel em i wanpela bikpela samting na Westpac i amamas long helpim ol pipel long lukautim na strongim

kalsa bilong ol.

Antap long dispela, Siaman bilong Nesenel Kenu na Kundu festival, Damien Bobole i tok tenkyu long Westpac long sapotim ol long dispela yia, na tu, long las yia.

"Dispela festival bai strongim kantri long sait bilong Turisim na Turisim i save bringim planti mani i kam insait long kantri long strongim ikonomi," Mista Bobole i tok.

Mista Bobole i amamas long lukim olsem Westpac i gat luk-save long Turisim na pasin bilong lukautim na strongim kalsa.



INVESTMENT TOKTOK with MICHAEL BLOCK

Wanem samting bai kamap taim prais i go antap na kam daun?

Sapos yu gat sampela askim plis salim kam long toktoksuper@nambawansuper.com.pg na mipela bai bekim ol.

Nambawan Super em long tem investa na bai kisim gutpela risal bilong ol membas ritaiamen seving long taim ol i wok stap.

Dispela em bikos Nambawan i gat gutpela long tem invesmen plen olsem ol kainkain asets we inap givim gutpela na seif win mani.

Tasol sampela taim prais bilong ol gutpela aset inap pundaun tu.

Dispela em bikos gutpela invesmen i no save go antap olgeta yia. Nambawan Supa save wok wantaim ol prais (we i go antap na kam daun we ol save kolim VOLATILITY) long mekim tripela samting.

- (1) Lukim olsem em gat gutpela long-tem invesmen plen
- (2) Stap isi na noken muv hariap long ol sotpela taim senis long prais, na
- (3) Skelim gut ol plen sapos ol prais i senis gut tru.

Ol ken mekim olsem long salim ol ovaprais invesmen na senisim go long narapela invesmen we i gat gutpela prais na lukluk long en.

Long narapela tok, BAIM LO, SALIM HAI

Kain olsem, lukim piksa bilong Australia sea prais long las 5-pela kris-mas. Long-tem win mani em gutpela tasol i gat ol bam stap namel long rot.

Em soim klia olsem gutpela aset we i ken mekim long-tem win mani ken pundaun long sotpela taim.

Short term
PAIN
Long term
GAIN



Long nau yet invesmen riten o win mani insait long PNG long 2014 i no bin gutpela olsem long 2013 taim NSL bin tokaut long krediting reit long 11.25% long wan yia. Nambawan Super i gat bilip olsem 2014 em wanpela long ol sot-tem senis (kain olsem drop long prais bilong Oil Search we i bin kamap long 2011. Na long-tem plen bai mekim gut yet long bihain taim kain olsem Oil Search i mekim long 2012, 2013 na 2014.

(Oil Search nau em \$9.67 gut nau bihain long em bin stap \$5.50. Nambawan wok long holim yet sea bilong em long Oil Search na bilip bilong em kamapim gutpela risal nau.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIGGER, BETTER, SAFER,
STRONGER AND STILL NUMBER 1**

Bodi bilong wanpela Katolik

Santu i no sting ...462 yia nau em bin dai

BODI bilong wanpela Katolik santu, em Santu Francis Xavier i no sting, tasol i stap gut yet long ples Goa long India, bihain long em i bin dai 462 yia i go pinis.

Jenerel Seketeri bilong Katolik Bisops Konprens bilong PNG na Solomon Ailan, Pater Victor Roche SVD, i bin go long Goa, India long dispela mun, Ogas 10,2014, na go long ples we bodi bilong Santu Francis Xavier i stap long en na kisim poto we yumi i ken lukim.

No gat planti pipel long wol em bodi bilong ol i no save sting bihain ol i dai, tasol em i mirakel long bodi bilong Santu Francis Xavier i stap gut yet na i no sting bihain long 462 krismas.

Mama i bin karim Santu Xavier long kantri Spain long yia 1506. Em bin bungim Ignatius bilong Loyola, narapela save-man na nau santu bilong Katolik Sios taim em i bin sumatin log Paris, Frans. Na em i bin joinim kongrikese bilong ol Jesuit o Sosaiti bilong Jisas.

Em bin kisim odinesen na kamap pater long yia 1537, na ol i salim em olsem wanpela misineri long India. Em nau, i stap olgeta long Is na autim Tok



MIRAKEL YA: Dai bodi bilong Santu Francis Xavier i stap insait long kofin long wanpela hauslotu long Goa, India. Xavier i bin dai moa long 450 krismas i go pinis, tasol bodi bilong em i no sting yet. Poto: **Pater Victor Roche SVD**

bilong Bikpela long Goa, Malacca na Japan.

Em bin givim Sakramen bilong Baptismo long moa long 300,000 pipel long 10-pela yia wok misineri bilong em.

Long yia 1552, em bin dai long Shangchwan, wanpela ailan long Saina, na ol i bin kidim bodi bilong em i go long Goa na ol i

putim em insait long hauslotu ol i kolim long "Basilika ov Bom Jesus" long Goa long India.

Namba wan taim ol i bin larim pablik i lukim dai bodi tasol i no bagarap i stap em long 1782, 230 krismas bihain log dai bilong em.

Tasol ol i save larim ol pilgrim i go lukim bodi bihain long olgeta

10-pela yia.

Laspela taim ol i bin larim pablik long lukim bodi long 2004, 2.5 milien pilgrim o bilip manmeri i bin go long ples Goa na lukim.

Long dispela yia, ol bai opim dua bilong ples we dai bodi bilong Santu Francis Xavier i slip long en stat long Novemba 22, 2014 inap long Janueri 4, 2015.

Asbisop toktok long wok bilong ol dikon

SEVIM God na ol pipel wantaim laik pasin em samting we tripela yangpela na nupela dikon i bin kisim odinesen o blesing i bin kisim strongpela toktok long en.

Asbisop John Ribat i bin mekim dispela toktok long Dikon George Baruka SM, Ambrose Kakatai SM na Benjamin Bosili taim em i tokaut long wok ol bai mekim nau insait long sios na komyuniti, bihain ol i kamap ol dikon.

Asbisop i tok wok bilong tripela olsem ol dikon em long:

- Helpim bisop na ol pater long wok;
- Kamap ol sevan o ol wok-man bilong pipel;
- Autim Gospel;

- Long daireksen bilong bisop, givim ol sakramen olsem Baptias, Santu Komyunio na laspela sakramen long ol lain i laik dai;

- Mekim ol sariti wok,
- I mas sevim pipel na i no pipel i sevim ol.

Asbisop Ribat i tok Jisas i soim eksampel long sevim ol narapela na tripela i mas sevim God na man wantaim laik pasin.

Em i tok i gutpela long harim Bikpela i tok, "Yu mekim gut yu gutpela wokman, kam insait long haus bilong God".

Tripela nupela dikon i bin kisim ol buk long helpim ol i strongim prea laip bilong ol na tu, mekim ol wok insait long sios na komyu-

niti. Supiria Jenerel bilong SVD Kolis, Pater George Rafer SVD i tok Dikon Benjamin SVD bai go mekim wok misin long Chile, Saut Amerika.

Tupela Dikon George Baruka SM, Ambrose Kakatai SM bai go wok namel long 40,000 pipel long Buin, Saut Bogenvil.

Dispela em i laspela yia bilong Marist Kolis long Bomana bikos stat long neks yia, ol yangpela man i laik joinim Marist Oda bai go skul long Fiji. Na dikon odinesen tupela Marist dikon i mekim em i laspela long PNG.

SVD i wanpela intanesenel oda o kongrikese na ol pater na rilijes bilong ol i wok long Afrika,

Latin Amerika, Yunaitet Stets, Filipins na PNG.

Nainpela SVD pater bilong PNG i wok nau long 7-pela kantri long wol olsem long Afrika, Amerika na Latin Amerika.

Katolik Sios i laikim moa yangpela man na meri i go insait long rilijes laip na sevim ol pipel long save long Tok bilong Bikpela, sevim long ol spirituel, sosel na fisikel eria na ol i ken kamap ol gutpela manmeri long famili, yuniti na kantri.

Olsem na ol Katolik famili long kantri i kisim askim long strongim ol pikinini bilong ol long lukluk long rilijes laip olsem vokesen eria we ol i ken sevim Bikpela, pipel na kantri.



Terry Borchard

Longpela taim Luteran Sios misinari i dai

WANPELA misineri i bin wok longpela taim long PNG na tanim Baibel i go long tokples Ipili long Enga Provins i dai pinis.

Terrance Henry Borchard i gat 72 krismas bilong Amerika i bin dai long Ogas 10,2014 long Amerika yet.

Mista Borchard i bilong Aberdeen, Saut Dakota, Amerika nae m i dai lusim meri bilong em Janet, pikinini meri Dahlia, Tami, Rachael na 4-pela bubu.

Mista Borchard i bin pinisim skul long Concordia Kolis na semineri we em bin kisim Mastas digri na we em bin skul long kamap wanpela Luteran Sios pasto. Em i gat Mastas digri long Lengus long Texas Yunivesiti na Doktoret long Intakalsere! Stadis long Fuller Tiolojikel Semineri long Pasedina long Amerika yet.

Laip na wok bilong em olsem Luteran misinari na trensleta bilong Buk Baibel i bin kisim em i go wok namel long ol Ipili pipel long Enga, PNG, stat long yia 1969.

Em bin wok wantaim ol pipel bilong Ipili long tanim Nupela Testamen na hap bilong Olpela Testamen long tokples bilong ol.

Famili bilong em i amamas olsem Mista Borchard nau i stap wantaim Bikpela na Sevia inap Jisas i kam bek gen long kisim olgeta manmeri long dispela graun.

Long Mande Ogas 18, ol i bin holim funere sevis bilong em long Grace Luteran Sios long Eugene, Saut Dakota long Amerika.

Ol Luteran mama pinisim stuwadsip stadi

Paulus Tali i raitim

MOA long 150 Luteran mama lida long Lae Siti seket, Morobe Provins i bin pinisim stuwadsip stadi.

Wanpela wik stadi i bin kamap long Kalvari Luteran Sios long Saina Taun long Lae.

Dawa Kale bilong Evanjelisim Dipatmen long Nesenel Luteran hetopis long Ampo i bin go pas long givim stadi i bin tokim ol mama lida olsem ol i mas save moa olsem wan wan laip bilong em i impoten long yumi i go long God.

Em bin tok sapos yumi givim yumi yet, bai lukim moa blesing bilong God i kapsait long yumi.

Misis Kale i tok moa olsem liklik samting yumi ol mama i mekim olsem lukautim haus, kamapim maket na givim taim long lukautim gut famili em rot we i bihanim stuwadsip we Papa God i save laikim.

Em bin tok dispela kain pasin long yumi lukautim samting na givim ofa i go long sios em bai yumi lukim blesing bilong em, na bai kam long yumi wan wan na laip bilong yumi tu bai senis.

Stadi i bin toktok tu long yumi wan wan em pes bilong Jisas na wanem wok yumi mekim em Jisas tu i lukluk itap long wanem wok yumi mekim.

Het meri insait long Lae Siti, Metty Peter, i bin makim ol mama na tok tenkyu i go long Misis Kale long givim stadi long ol mama.

Em bin tok dispela kain skul i bikpela samting long laip bilong ol meri bikos em i mekim ol i luk-save olsem ol yet i no inap, tasol wantaim Jisas, samting bai kamap.

Em i tok insait long famili laip tu, ol kain kain hevi i wok long kamap na olsem long laip na stap bilong ol yangpela man na meri, ol kain samting samting i kamap long bagarapim laip na sindaun olsem ol drak, mariwana na bikhet pasin.

Em i tok yumi mas menesim gut laip bilong yumi yet.



Sampela ol bilip manmeri, ol famili, wantol, pren na hauslain i bin kamap long dikon odinesen long Bomana semineri.



Ol gan olsem i kamapim hevi bilong lo na oda long sampela PNG komyuniti. Foto: ABC

ANZ Bank i gat bilip long PNG ikonomi

ANZ we i wanpela long ol bikpela bank i wok long Pasifik i gat bilip olsem long sait bilong mani na bisnis long Papua New Guinea bai kamap strongpela moa.

Sif Eksekutiv Opisa bilong ANZ Group, Mike Smith, i tok em i gat bilip olsem ikonomi na ol wok bisnis long Papua New Guinea bai kamap strong moa yet aninit long ol wok bisnis ol i kolim Asian Century.

Mista Smith i bin tok tu olsem PNG gavman nau i mas wok hat long lukim olsem ol wok bisnis i mas kamap strong.

Mista Smith i bin autim dispela tingting bilong en long wanpela kaikai em lain bilong Port Moresby Chamber of Commerce na Industry (POMCCI) i bin rediim long Fraide long Pot Mosbi.

David Conn em Sif Eksekutiv Opisa bilong Port Moresby Chamber of Commerce na Industry i tok ol i wanbel long dispela hap toktok long ikonomi bilong PNG i gat bikpela potensal long kamap bikpela moa, wankain olsem ol kantri bilong Asia.

Tasol Mista Conn i tok gavman i mas stretim planti samting long wokim gutpela rot bilong dispela gro long mani na bisnis long kantri.

Wari bilong gan i kamapim hevi

DIFENS Fos komanda bipo bilong Papua New Guinea i tok ol lida bilong kantri i no gat laik long kamapim lo long rausim ol gan na daunim vilans long komyuniti. Planti gan i kamapim hevi long ol PNG komyuniti.

Difens Fos komanda bipo bilong Papua New Guinea, Jerry Singirok, i tok ol lida bilong kantri i no gat laik long kamapim lo long rausim ol gans na daunim vilans long komyuniti.

Jerry Singirok i mekim dispela toktok bihainim ripot bilong World Bank long dispela wik olsem bikpela wari bilong lo na oda i wok long bagarapim ikonomi na ol wok bisnis long PNG.

Dispela ripot bilong World Bank i bin tok olsem 8-pela namel long 10-pela bisnis long kantri i save lusim bikpela mani long wari bilong kraitim.

Dispela ripot i tok wari bilong lo na oda i save stopim ol nupela kampani long statim ol bisnis bilong ol long PNG.

Ol i tok tu olsem ol bisnis i save lusim planti mani tumas long yusim ol sekyuriti kampani long lukautim ol bisnis bilong ol.

Long yia 2006 Mista Singirok i bin go pas long wanpela wok painimaut long ol gan long komyuniti, na em i bin kamapim wanpela ripot na givim i go long gavman, tasol emi tok ol gavman bilong bipo na tude i no bihainim wanpela tingting bilong dispela ripot.

Solomon Ailan i gutpela ples long ol Australia bisnis

PRAIM Minista Gordon Darcy Lilo bilong Solomon Ailan i tok kantri bilong em i gat planti eria we ol bisnis long Australia i ken go na inves long en.

Em i mekim dispela toktok long dispela Australia Solomon Islands Business Forum and Trade Expo we em i bin opim long Brisbane long dispela wik.

Mista Lilo i tok, gavman blong em i wokim pinis sampela senis long sait long invesmen lo we bai mekim gutpela moa long ol foren kampani long go wokim bisnis long kantri.

Pacific Beat program bilong Radio Australia i bin toktok wantaim Praim Minista Lilo na em i tok olsem long dispela.

Mista Lilo i tok ol namba wan eria we ol foren kampani i ken go inves long en long Solomon Ailan em i karamapim tu sait long bildim ol infrastraksa olsem ol rot, bris na long planti moa ol kankain konstraksen wok.

Em i tok ol resos na turis bisnis tu i stap, long wanem planti long naturel risos long kantri i stap gut yet long ol turis i ken go lukim.

Long sait long maining, Praim Minista Lilo i tok kampani bilong Australian em Barbara i go het long toktok nau long ol i givim bek long Goldridge Mine long Sentral Guadalcanal, i go long Solomon Ailan gavman.

Planti toktok tu i bin kamap long wari long sait long sekyuriti long dispela Goldridge main.

Tasol Mista Lilo i tok kantri i stap isi stat long taim Regional Assistance Mission to Solomon Islands i kamap long 2003, na sait long sekyuriti long main em i no bikpela wari.

Wok turism bai helpim PNG ikonomi

WOK bilong turisim inap bringim planti moa mani long strongim ikonomi bilong Papua New Guinea winim ol wok maining, oil na gas.

Paul Barker executive Dairekta bilong Institute of National Afeas long PNG i tok long Pot Mosbi.

Mista Barker i tok PNG i gat ol strongpla kalsa, na tu em i gat planti kain kain samting olsem ol maunten, ol bikbus, ol pisin na ailan em ol i ken pulim ol turis i kam long ol narapla kantri.

Em i tok ol wok bilong gol, kopa, tin maining, oil na ges i gat mak long pinis, tasol wok bilong turisim na egrikalsa bai go het moa yet, olsem na gavman i mas strongim ol dispela wok o sekta.

Tasol em i tok tu olsem tupela samting em ol i kamapim hevi liklik long dispela wok em prais bilong baim balus tiket i stap antap tumas na tu, wari bilong lo na oda.

Ol poto Nius



GRUP PIKSA: Seketeri bilong Woks, David Wereh, Deputi Praim Minista, Leo Dion, Gavana Jenerel Sir Michael Ogio, CJJETCC Menesing Dairekta, Meek Luo na Jiang Jiquing i sanap wantaim bihain ol i sainim surij menesmen projek bilong Kokopo Taun, Is Nu Briten Provins. Bilong wokim projek, em i kostim moa long K88 milien we wanpela kampani bilong Saina em China Jiangsu International Economic Technical Cooperation Corporation Ltd (CJJETCC) i bin winim kontrak long karimaut. **Poto: Gavana Jenerel Midia**



SEKAN: Gavana Jenerel, Sir Michael Ogio i sekan na tok amamas long CJJETCC Menesing Dairekta, Meek Luo. **Poto: GG Midia**



TAIWAN HELPIM: Bikman i makim Taiwan Tred Misin (TTM) long PNG, Daniel Hu, wantaim ol medikel dokta na nes bilong Taiwan i bin kam mekim volantia wok na givim fri sevis i go long ol manmeri i gat sik kensa long PNG, moa yet long Lae Angau Memoriel Haus sik long dispela mun. Poto i soim sampela ol marasin we grup i donetim i go long kensa yunit long Lae. **Poto: TTM**

Mekim moa wok painimaut pastaim long wara saplai bilong Mosbi


Wok bilong givim ol kain sevis olsem wara na pawa saplai em i bikpela hatwok tru na i gat planti salens long kamapim gut wok.

Ol dispela kampani bilong gavman olsem PNG Power na PNG Water em tupela kain lain olsem husat i mekim bikpela wok bilong lukautim wara na pawa saplai.

Olgeta yia i gat bikpela salens i save kamap long painim inap mani bilong bekim ol dinau bilong ol na mekim gutpela wok bilong givim pawa saplai i go long ol kastoma. Wara tu i wankain, PNG Water na Eda Ranu long Mosbi i mas mekim wok bilong saplaim gutpela klinpela wara saplai i go long ol pipel.

Long dispela wik, gavman i helpim PNG Power wantaim K10 milien long bekim dinau bilong em long benk. Benk i givim las tok lukaut pas i go long PNG Power long bekim dinau hariap olsem na gavman i helpim em. I tru olsem PNG Power i wanpela kampani bilong gavman tasol em i no wokim profit. I gat hevi oltaim bikos em i no kisim gutpela profit long ol kastoma bilong en. Mani i kam long ol kain senta olsem Mosbi, Lae, Hagen na Kokopo tasol, ol arapela senta i no save kamapim profit.

Na long Mosbi nau, wara kampani, Eda Ranu i singautim gavman long givim helpim mani inap long K1.2bilien long skruim wok i go bikpela long givim moa wara i go long NCD. Eda Ranu i tok ol i



mas kamapim narapela wara tritmen plent long givim moa wara i go long siti. Nau i gat wanpela tritmen plent tasol i stap long Mt

Eriama inap kamapim 184 milien megalitas wara long wanpela de. Dispela mak i antap tumas olsem na i mas gat wanpela moa tritmen

helpim ol. NCD i save kisim bikpela mani tru long kain kain takis long ol bisnis, rent bilong graun, na planti arapela moa.

plent bilong givim wara saplai.

I tru olsem Eda Ranu i no bikpela tasol em i nidim samting olsem K3milien i go inap long K4 milien long mekim ol wok bilong en. Tasol Eda Ranu i gat bikpela dinau i stap yet wantaim wanpela kampani bilong Malaysia we olgeta mun, em i save givim bikpela hap mani i go long stretim dispela dinau.

Dispela kain mani, K1.2 bilien Eda Ranu i askim nesanel gavman long givim em i bikpela mani tumas long helpim liklik lain pipel tasol long NCD na sampela hap insait long Sentral provins.

Mobeta ol i askim Nesanel Kepitel Distrik Komisnin wantaim Sentral Provins tu long

Dispela askim bilong Eda Ranu em i gutpela sans tu long gavman i mas mekim gutpela wok painimaut long wara saplai nid bilong Mosbi na Sentral Provins na bai ol i kisim wara long wanem hap tru na pamim i go long dispela nupela tritmen plent. Wara saplai i mas kam long narapela hap nau bikos PNG Power na Eda Ranu i save kisim wara long wanpela hap tasol na long taim bilong bikpela san, wara tu i save sot long givim inap pawa na wara i go long Mosbi siti.

Mosbi i wok long gro hariap tru. Moa ovasis bisnis kampani i kam wok hia, moa haus i sanap, moa setelmen i kirap na moa pipel i lusim ples bilong ol na kam painim taun laip long siti. Eda Ranu wantaim NCD i ken yusim dispela sans long stretim gut wara saplai i go long ol setelmen na ol narapela kona bilong siti we i no gat wara saplai yet. Ol foapela memba bilong palamen tu i mas wok bung long stretim dispela hevi bilong wara saplai insait long siti. Ol i givim mani long pulim wara saplai i go insait long ol setelmen na ol ples i stap insait long siti.

Yumi olgeta i wanbel olsem i mas gat gutpela wara saplai bilong bikpela siti bilong Papua Niugini. Tasol i mas gat gutpela wok bung namel long olgeta lain bipo long wok i gohet. Na Eda Ranu wantaim NCD na Sentral Provins i mas putim mani pastaim na bihain ol i ken singaut long gavman long helpim ol.

Nesanel prea de bringim PNG kam klostu long God

PREA em samting bilong yumi ol Kristen manmeri olsem na Nesanel Gavman i mekim gutpela pasin long makim Ogas 26 olsem Nesanel Prea De insait long Papua Niugini we yumi olgeta i ken kam bung wantaim na mekim prea i go long God Papa bilong yumi.

Taim olgeta lida bilong kantri i bung long Nesanel Palamen long prea long dispela wik, planti Kristen insait long Papua Niugini tu bin bung na prea long wanwan provins na hap ol i stap long en. Olgeta prea i sut long tingim God olsem em God bilong Israel na yumi tu long Papua Niugini.

Prea long tok tenkyu long God long olgeta gutpela samting emi save givim long yumi olgeta de. Presen bilong em i save pulapim yumi olgeta taim, olsem na yumi mas tok tenkyu.

Kantri bilong yumi i no save bungim olgeta hevi na



trabel olsem ol arapela kantri i bungim tude olsem bikpela pait na woa, bikpela tait na guria we i kilim planti manmeri na bagarapim ples, na planti arapela bikpela hevi na bagarap. Olsem na yumi mas tok tenkyu long God long dispela. Em i save was long yumi olgeta taim.

Kantri bilong yumi i pulap tru long ol kankain mineral na naturel risos olsem gol, kopa, oil, ges, kopi, kakao, kopra, ol kaikai bilong gaden na planti planti blesing i pulap tru long Papua Niugini. Olsem na yumi mas tok tenkyu long God.

hangre i bagarapim ol pipel. Kaikai i pulap tru na yumi amamas na stap. Olsem na yumi mas tok tenkyu long God.

Olgeta pipel bilong PNG em ol gutpela manmeri i stap na ol i save amamas long bung wantaim na serim samting wantaim.

Yumi mas prea long God long olgeta taim. Taim bilong ren, taim bilong san, taim bilong hevi na wari, taim bilong amamas na olgeta taim. Prea em olsem yumi toktok wantaim God bilong yumi. Prea em i pawa bilong gutpela sindaun, amamas na moa blesing bai pulap long yumi yet.

Bilong gavman long makim nesanel prea de em i bikpela samting. Yumi tok tenkyu long God long givim dispela gutpela tingting long ol lida bilong yumi long Palamen long makim dispela de we yumi ken sindaun na bungim tingting na tingim God na prea long em.

PNG em i Kristen kantri na

yumi em ol Kristen manmeri bilong God, olsem na dispela em i no asua long yumi ken mekim olsem olgeta yia insait long kalenda bilong kantri long makim Nesanel Prea De long olgeta yia.

Mi bilip olsem God i harim prea bilong yumi pinis na em i blesim kantri bilong yumi na ol lida bilong yumi long mekim ol gutpela wok long sevim ol pipel bilong yumi long nau na long ol taim i kam.

Taim ol lida i save daunim ol yet na brukim skru long God long prea, God i save harim prea bilong ol na blesim ol na ol pipel bilong ol.

Yumi save ritim long buk Baibel olsem Jisas yet em i God tasol em i save oltaim prea long God.

Em i save pas klostu long God long olgeta samting em i laik mekim. Jisas i soim yumi pinis long pasin bilong prea olsem na yumi ol lida na ol pipel i mas oltaim mekim olsem long toktok long God olgeta taim long pasin bilong prea.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia

Websait: www.wantokniuspepa.com

Pe bilong wanpela yia, 52 niuspepa

PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Diskoneksen eksasais i kamap long Kwikila dispela yia.

Ol Siaman bilong Wara PNG na IPBC i autim belhevi bilong ol long ol trabel man i bagarapim laip bilong wanpela wokman bilong WPNG



WPNG Siaman William N. Sweet.



IPBC Siaman Paul Nerau.

POT MOSBI, 21 Ogas, 2014 Wara PNG Siaman, William N. Sweet na IPBC Siaman, Paul Nerau i tokaut strong long bel hevi bilong tupela long ol lain i bin kamapim birua long Wara PNG Bisnis Senta Menesa long Wewak, Danny Seolo taim tupela i bin go long lukim em las wik.

IPBC Siaman i tok: "Long makim maus bilong IPBC na ol stekholda bilong en, ol lain kampani bilong gavman (SoE) hia long PNG; mi tok sori tru long yu na ol lain famili bilong yu, long kain pasin no gut ol trabel man i bin mekim long yu insait long eria bilong kampani bilong yu long Wewak, long Tunde nait, 12 Ogas, 2014."

"Long dispela taim i no gat klia toktok yet long ol dispela trabel man, tasol mi laik tok olsem dispela kain pasin em i no gutpela tru. Olsem Siaman bilong IPBC, mi gat bikpela wari olsem mipela i gat asua long mekim wok bilong Kopret Visen na Misin long bringim gutpela kwaliti sevis long ol pipel bilong Papua Niugini olsem Ekt i tok long mipela i no ken pret o wansait, na yu bin mekim wok bilong yu gut olsem wanpela wokman bilong kampani i go aut long mekim wok bilong en long sevim ol pipel bilong PNG.

"Mi tok tokaut olsem IPBC

i sanap wantaim na strong olsem olgeta objektiv bilong en aninit long ol SoE bai kamap yet na mipela i no inap suruk long ol hevi i kamap long stopim mipela na mipela i no inap ranawe long ol salens i kam, mipela bai go het long wok bung wantaim long inapim nid bilong ol stekholda bilong mipela gut, maski mipela bungim salens long taim mipela i mekim wok.

"Wantaim dispela sotpela toktok, mi tok sori gen long yu na tu mi tingting strong long yu bai kamap orait kwiktait, na God i ken givim yu bel isi na mekim yu orait gen."

Long wankain taim, Siaman Sweet i bungim maus wantaim mi tu na tok dispela kain birua i kamap long wok man bilong gavman em i no gutpela stret. Em i tok olgeta lain i mas bungim maus na tokaut olsem dispela kain pasin bilong birua long ol SoE woklain i mas stop.

"Mi gat bilip olsem ol atoriti bai mekim wok bilong ol long holim pasim ol dispela trabel man na bringim ol i kam long lo bilong soim pasin bilong lukautim gut demokresi na wok bilong lo i mas bosim olgeta pipel.

Em i tok tu olsem ol woklain tu i mas was gut na ol i mas tok save long ol lain bilong strongim lo olsem polis hariap tasol, sapos i gat sampela kain tok pret i kamap long ol.

Stori bilong Wara PNG:

Wara PNG em i wanpela kampani bilong gavman (Stet on Enteprais) na em i wok bilong em long lukautim na saplaim wara na senitesen sevis insait long Papua Niugini (PNG).

Aninit long Nesanel Wara Saplai na Suris Ekt (NWSSA) 1986, gavman i givim wok wok long Wara PNG long mekim plen, wokim wok na menesim olgeta wara saplai na suris sistem insait long PNG we i

stap ausait long Pot Mosbi siti.

Wara PNG nau i save ranim na menesim ol wara saplai sistem long ol paip na suris o toilet sistem insait long ol 19-pela bikpela taun na ol distrik stesen ausait long Pot Mosbi. Wara saplai na suris sistem bilong Nesanel Kepital Distrik em i stap aninit long 'Nesanel Keipital Distrik Wara Saplai na Suris Ekt 1996,' aninit long Eda Ranu.



Toksave bilong Katim Wara

Toksave i go olsem Wara PNG bai wok long katim wara yet long ol kastoma husat i gat dinau i winim 3-pela mun na i no baim wara bilong ol.

Ol opis bilong gavman olsem Polis Dipatmen, PNG Difens Fos, Koresenel Sevis, Helt & Haus sik na ol skul tu i mas baim sampela bilong ol dinau bilong ol long tripela mun wara bil sapos no gat bai mipela katim wara bilong ol.

Olgeta wara bil invois i go long ol kastoma i gat deit bilong baim i stap. Toksave i go long ol kastoma olsem 7-pela de bihain long taim ol i givim aut wara bil, Wara PNG i ken katim wara saplai eni taim.

Sapos Wara PNG i holim sampela lain i stilim wara o konektim wara nating Wara PNG bai sasim ol wantaim ol dispela fi o bai kisim sampela strongpela mekim save:

- K2000.00 sapos long haus bilong wanpela famili
- K10,000 sapos em i indastri, kampani o Gavman opis kastoma
- Ol bai sasim ol long namel mak bilong wara bil stat long taim ol i katim wara mita
- Baim olgeta dinau bilong bipo wantaim sas fi na bon fi
- Baim nupela wara paip long taim bilong konektim wara gen

Ol kastoma i mas kisim toksave gen long 30 de kredit polisi. Wanpela kastoma husat i gat 90 de wara bil dinau, ol bai putim nem bilong em long katim wara bilong em hariap tasol.

Wara PNG woklain i gat rait aninit long Nesanel Wara Saplai na Suris Ekt, long kam insait long eria we wara paip bilong em i ran lon gen. Na sapos wanpela kastoma, o lain wantok o sapota bilong ol i laik traim long stopim o mekim nabaut long ol woklain bilong Wara PNG long taim ol i laik mekim wok bilong ol; baim kisim Kot Oda. Olgeta pablik manmeri tu i mas wanbel na helpim ol woklain bilong Wara PNG long mekim wok bilong ol.

Long kisim moa toksave, yu mas go long lokal Bisnis Senta Opis o kontektim Pot Mosbi Tim long ol namba tamblo long boks:

Nem	Posisen	Telepon	Email
Thomas Turkaul	Kredit Kontrola	3031634	tturkaul@waterpng.com.pg
Martin Geno	Kastoma Sevis Opisa	3031640	mgeno@waterpng.com.pg
Theresa Boli	Menesa-Kredit Kontrol	3031638	tboli@waterpng.com.pg

Helpim mipela long mekim wok bilong yu gut – Baim Wara Bil bilong yu hariap.

Dispela toksve i kisim tok orait bilong Sif Eksektiv na Menesing Dairekta, Raka Taviri Jr

*Ol sumating
bilong DWU i
karim gutnius i
go long Karkar
Ailan.*

James Kila i raitim

1. Ol memba bilong DWU TSCF ministri i pre na autim tok long ol sumatin long Kalik praimer skul long Karkar ailan.

DWU TSCF ministri autim gutnius na aweanes long Karkar ailan

“PAPA God i gat plen long laip bilong yu wan wan man na meri long dispela graun...olsem na yu mas lukautim gut dispela laip Papa God i givim long yu, na stap oltaim wantaim Bikpela na laip bilong yu bai stap gut oltaim.”

Dispela em strongpela salens wanpela sumatin meri bilong Divain Wod Yunivesiti (DWU), Trisilla Waikasi givim taim em i sanap na toktok long ol praimer skul sumatin na tisa long Kalik praimer skul long ples Komoria long Karkar ailan long Madang provins.

Trisilla i stadi long PNG Stadis Intenesenel Rile-sens long DWU, tasol em i bin skul bipo long Kalik praimer skul. Las wik em i go wantaim ol lain wanskul bilong em bilong DWU

Ol dispela 18 sumatin bilong DWU em planti bilong ol i bilong ol narapela provins long PNG. Tasol ol i bung wantaim long bringim tok bilong Papa God i go long ol komyuniti long Karkar long helpim ol yut na yangpela long senisim pasin na bihainim gutpela Kristen pasin em Papa God i laikim.

Ol dispela memba bilong DWU TSCF Ministri i sakrifais long stadi taim bilong ol long go long Karkar long serim tok bilong Papa God wantaim ol komyuniti long ailan. Ol i mekim felosip na singim song na serim tok bilong Baibel. Namel long program ol i mekim awenes tu long nogut bilong mariwana (spak-brus) na yawa (homburu) we tude em planti yangpela man i save kisim na bagarapim laip bilong ol.

Long taim ol i stap long



givim strongpela salens stret long ol yangpela sumatin meri long sait long ol sumatin i save stap long skul yet na i gat bel.

Trisilla i salensim ol sumatin meri olsem ol i mas lain long kontrolim filings bilong ol. Em i tok olsem sapos ol meri i save long Jisas Kraus long laip bilong ol, bai ol i ken kontrolim ol filings bilong ol na no inap kisim bel na karim pikinini taim ol i stap long skul yet.

“Bodi bilong yupela em bikpela samting tru Papa God i wokim,” em i tok.

“Bodi bilong yupela em i no samting nating, na yu no ken salim nating long kisim K50 o yawa. No ken givim nating bodi bilong yupela long narapela mani,” em i tok.

Narapela DWU man sumatin i sapatim toktok bilong Trisilla na tok olsem sapos ol sumatin i stap liklik yet na lain long pret long Papa God, em ol bai lain

long kontrolim ol filings na wokabout bihainim gutpela pasin bilong Jisas Kraus.

Dispela sumatin i givim salens long ol praimer skul sumatin na ol tisa olsem ol i mas oltaim ridim Tok bilong Papa God long Buk Baibel.

Ol DWU sumatin i givim tu salens long ol yangpela long praimer skul olsem sapos ol i putim God namba wan long laip bilong ol, bai ol i lukim wanem gol o mak ol i laik go long en.

“Papa God i gat plen long laip bilong yu. Stap wantaim Bikpela na holim strong Bikpela na laip bilong yu bai stap orait oltaim,” em i tok.

Sinia tisa long Kalik praimer skul, David Setu i givim bikpela tok tenkyu long ol DWU TSCF ministri long taim bilong ol long autim ol naispela na switpela tok long opim tingting

bilong ol yangpela sumatin long Kalik.

Mista Setu i tok dispela em nupela taim stret long lukim ol yunivesiti sumatin bilong DWU i go long kain liklik praimer skul olsem Kalik long serim tok bilong Papa God na givim ol gutpela tingting long ol praimer skul sumatin.

Alexia Sangeng, wanpela mama husat i makim ol papamama i tok amamas long Trisilla, husat i kam wantaim ol lain bilong em long Kalik long autim naispela skul tok na awenes long ol yangpela sumatin na ol tisa.

Mama Alexia i tok dispela sumatin i go long bikpela skul, tasol em i kam bek gen long Kalik praimer wantaim ol wanskul bilong em bilong DWU long givim gutpela ol skul tok na salens long ol sumatin long lukautim gut laip bilong ol Papa God i givim.



2. Wanpela drama i soim pasin nogut bilong dispela graun.

long bringim naispela na switpela tok bilong Papa God i go long olpela skul bilong em.

Ol dispela sumatin bilong DWU em ol memba bilong Teseri Studens Kristen Felosip (TSCF) na ol i mekim wok ministri bilong ol long serim tok bilong Papa God long ol praimer skul na ol Kristen manmeri long Karkar ailan.

Ol i bin go stap slip long Komoria namba 2 viles na mekim ol autris na ministri long ol praimer skul olsem Kalik, Kavailo, Dangsai, Nitlon na Makudui. Long las wik Fraide ol dispela lain DWU sumatin i bin go long Karkar sekenderi skul.

Ol praimer skul sumatin bilong Kalik praimer i amamas stret na stap long naispela filings stret taim ol i lukim na harim ol naispela skul i kam long ol yunivesiti sumatin bilong DWU.

ples Komonia namba 2, long nait ol i save mekim felosip na lotu. Ol i mekim tu awenes na givim naispela ol toktok long ol yut o yangpela manmeri i mas abrusim pasin nogut bilong kisim mariwana na yawa (homburu). Yawa na mariwana em wanpela bikpela hevi namel long planti ol yangpela man long taun na rural eria long PNG na i save givim planti hevi tu long komyuniti.

Wan wan ol memba bilong DWU TSCF ministri i bin givim naispela ol skul tok na autim tok bilong God na serim wantaim ol sumatin long ol skul ol i go long en. Ol i putim kamap drama long soim ol pasin nogut we planti yangpela tude i save mekim na paul long bihainim gutpela Kristen pasin em Papa God i laikim.

Long Kalik, Trisilla i



3. Ol tisa bilong Kalik Praimer i sanap fran na ol TSCF ministri i beten long ol.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta
2pm - 6pm - Sarere Avinun Cruz

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

Raun wantaim Wantok kru ...

Lamana bai amamasim 20 yia

Nicky Bernard i raitim

LAMAN Hotel bai amamasim 20 yia long dispela wiken. Stat long Fraide nait bai lukim ol bik nem ben we i save pilai long Lamana amamasim ol ges na ol memba bilong klab.

Sampela bilong ol nupela ben na ol solo manmeri tu bai singsing long dispela nait long amamasim 20 yia bilong dispela Hotel long PNG i wok long gro hariap.

Lamana em i wanpela hotel we i gat planti rum na tu, ol kliklik haus bilong rentim na stap. Tasol dispela ino pinis, ol i kamapim tu ol opis ples bilong rent.

Lamana i gat ol susa hotel tu insait long kantri tasol em sanap em yet na strongim long kamap inap 20 yia olgeta long PNG.

Nem Lamana i save pairap long olgeta hap long kantri, long wanem em i save lukautim planti ol bikpela bung na ol bikpela nait so insait long kantri.

Long makim dispela 20 yia bilong ol, Lamana bai kamapim wanpela bikpela nait so long Fraide na Sarere nait long amamasim ol kastoma bilong em na ol dai hat memba bilong ol.

Planti ben bai pilai long bring bek ol memori bilong bipo i kam bek long taim dispela liklik hotel i stat na gro i kam inap long dispela yia.



Natalia Maino na Gwadus ben bai stap namel long sampela narapela ben manmeri long amamasim dispela nait bilong 20 yia bilong Lamana.

EMTV Television Guide

FONDE OGAS 28, 2014

4:30 AM G AUSTRALIAN NETWORK

5:00 AM G JOYCE MEYER 1093-4

5:30 AM G EMTV NEWS REPLAY

EMTV brings you a flashback of yesterday's National News, sports and weather.

6:30 AM G TODAY

Join Karl Stefanovic, Lisa Wilkinson and the team as they bring you the latest in News, Current Affairs, Sports, Politics, Entertainment, Fashion, Health and lifestyle.

09:00 am G CLASSROOM BROADCASTS

3:30 PM G KIDS KONA

HI 5 S12 EP#7/39
NEW MACDONALD'S EP#20/52
PYRAMID S3 EP#46/68

SHAK S5 EP#3/33

5:30 PM G PACIFIC WAY EP#10

6:00 PM G EMTV NATIONAL NEWS

7:00 PM G RAIT MUSIK EP#226

8:00 PM G 2014 - NRL GAMES ROUND 25

BULLDOGS vs. RABBITOHS

10:00 PM G RESOURCE PNG Ep#31

Join our EMTV Team, as they bring to you news, interview and highlights on the Mining Industry.

10:30 PM G SOKA XTRA EP#25

10:40 PM G GAME ON - EP#7

11:00 PM G NRL FOOTY SHOW Ep#26

01:00 AM G NEWS REPLAY

FRAIDE OGAS 29, 2014

4:00 AM G AUSTRALIA NETWORK

5:00 AM G ENJOYING EVERYDAY LIFE WITH

5:30 AM G EMTV NEWS REPLAY

6:30 AM G TODAY

Join Karl Stefanovic, Lisa Wilkinson and the team as they bring you the latest in News, Current Affairs, Sports, Politics, Entertainment, Fashion, Health and lifestyle.

09:00 am G CLASSROOM BROADCASTS

3:30PM G KIDS KONA

HI 5 S12 EP#8/39

NEW MACDONALD'S EP#21/52

PYRAMID S3 EP#47/68

SHAK S5 EP#4/33

5:30 PM G SKIPPY - FRED

5:55 PM G CRIME STOPPERS

6:00 PM G EMTV NATIONAL NEWS

7:00 PM G IN MORESBY TONIGHT -

2014 NRL - ROUND 25

BRONCOS vs. DRAGONS

9:30 PM G FRIDAY NIGHT MOVIE - SNOW

11:30 PM G EMTV NEWS REPLAY

SARARE OGAS 30, 2014

4:30 AM G AUSTRALIA NETWORK

6:00 AM G EMTV NEWS REPLAY

7:00 AM G IN HIS STEPS EP#28

7:30 AM G SKILLICIOUS S2. EP#1/7

8:30 AM G DANI'S HOUSE S1 EP#8/12

9:30 AM G ULTIMATE GUINNESS WORLD

RECORDS - EP#25/52

10:00 AM G PACIFIC WAY - EP#10

10:30 AM G SKIPPY- FRED - Rpt.

11:00 AM G TANIM GIRAUN - EP#2

12:00 PM AUSTRALIA NETWORK

3:00 PM G 2014 NRL - ROUND 25

KNIGHTS vs. EELS

5:00 PM G TBA

5:30 PM G OLSEM WANEM EP#34

6:00 PM G EMTV NATIONAL NEWS

Join our News Team as they bring to you what's happening around the country and abroad in News, Sports & Weather..

6:30 PM G 2014 NRL - ROUND 25

RAIDERS vs. WEST TIGERS

8:30 PM G 2014 NRL - ROUND 25

ROOSTERS vs. STORM

10:30 PM G EMTV NEWS REPLAY

SANDE OGAS 31, 2014

3:30 AM G AUSTRALIA NETWORK

6:30 AM G EMTV NEWS REPLAY

7:00 AM G HILLSONG

TORO



BIABIA




KANAGE



KROSWOD

- | | | |
|--|--|--------------------|
| Akros | 29 Strongpela samting | 22 Namba seven mun |
| 1 Nupela provins | 30 Wantok bilong karakum | 23 Namba |
| 4 _____ yu kam gud ya! | | 25 Ol soldia |
| 8 Givim glori i go long God | Daun | 27 Wankain olsem 8 |
| 10 Painim long Lahir | 2 Namba bilong PNG | |
| 11 No | 3 Painapol | |
| 13 I no hatwok | 5 Gavana bilong Saten Hailans | |
| 14 Marasin frut | 6 I save kamap long ain na kapa | |
| 16 Minista bilong ekstenal Teritori long taim Australia lukautim PNG | 7 Ailan long Sandaun | |
| 18 Ailan long Manus | 12 Pawa lait long taim swis i stap olsem | |
| 20 Politikal Pati | 15 Gaden kaikai | |
| 21 Kain kain pilai | 17 Soim amamas | |
| 24 Nem bilong meri | 19 Siti long Hailans | |
| 26 Kamap bikpela | 21 I lait long skai | |
| 28 Mak bilong luksave | | |



Ansa bilong las wik krowod, isu # 2085

SUDOKU

2	7	3	8	9	4	6	5	1
8	5	1	2	6	7	3	9	4
6	4	9	5	3	1	8	2	7
4	6	5	9	7	8	2	1	3
7	9	8	1	2	3	5	4	6
1	3	2	6	4	5	9	7	8
5	8	6	4	1	2	7	3	9
3	2	4	7	8	9	1	6	5
9	1	7	3	5	6	4	8	2

Ansa bilong las wik Sudoku # 58

	6		3	5				
9	2					5	6	
	1	5	9		6	3		
			8		2	4		
4	6		1		2		8	
		1	7		3			
	2	6		7	8	4		
4	7						3	9
				9	4			2

Ansa bilong Sudoku # 59 neks isu

H	E	L	A		B	A	R	A
		O	N	A		G	O	L
N	O	G	A	T		I	S	I
		N	O	N	I		R	
B		H	A	S	L	U	C	K
A	H	U	S		A			
N	A			S	P	O	T	
A	G	A	T	A		G	R	O
N	E	M		N		A	I	N
A	N	I	S			S		A

Ansa bilong las wik krowod, isu # 2085

EMTV Television Guide

7:30 AM G AUSTRALIA NETWORK	8:00 PM G TANIM GIRAUAN EP#2 - RPT.	HI 5 S12 EP#4/39	latest in News, Current Affairs, Sports, Politics, Entertainment, Fashion, Health and lifestyle.
8:30 AM G BUSINESS PNG YR.3 EP#30 rpt.	9:00 PM G 60 MINUTES	NEW MACDONALD'S EP#17/52	
9:00 AM G TOTALLY SPIES EP#24 - RE-RUN	10:00 PM MAO SUNDAY NIGHT MOVIE	PYRAMID S3 EP#43/68	TRINDE OGAS 27, 2014
9:30 AM G OLSEM WANEM EP#33- RPT	- EAT, PRAY LOVE	THE SHAK S4 - EP#66/66 finale	09:00 am G CLASSROOM BROADCASTS
10:00 AM G RESOURCE PNG EP#31 - Rpt		5:30 PM G SKILLICIOUS SEASON 2 -	3:30 PM G KIDS KONA
10:30 AM G WILDLIFE WITH TIM FAULKNER	11:30 PM G HILLSONG Rpt.	5:55 PM G CRIME STOPPERS	HI 5 S12 EP#5/39
11:00 AM G RAMSAY'S COOKING SHOW - EP#3 & 4	00:00 AM G EMTV NEWS REPLAY	6:00 PM G EMTV NATIONAL NEWS	NEW MACDONALD'S EP#18/52
followed by the Australia Network	7:00 PM G 2014 NRL ROUND 24	PYRAMID S3 EP#44/68
		PANTHERS vs. STORM	SHAK S5 EP#1/33
		9:00 PM G COCA-COLA SPORTS SCENE EP	5:30 PM PG DANI'S HOUSE - SEASON 1 -
		10:30 PM G EMTV NEWS REPLAY	6:00 PM G EMTV NATIONAL NEWS
		TUNDE OGAS 26, 2014	7:00 PM G HAUS & HOME Ep#28
			8:00 PM G BUSINESS PNG YR.3 - Ep#30/2014
12:00 PM G AUSTRALIA NETWORK	MANDE OGAS 25, 2014		8:30 PM G A BRAND NEW DAY
2:00 PM G 2014 NRL - ROUND 25	4:00 AM G AUSTRALIA NETWORK	5:00 AM JOYCE MEYER 1093-2	Gold Ring Media brings to us a new program
WARRIORS vs. TITANS	5:00 AM G JOYCE MEYER - 1093-1	5:30 AM G NATIONAL EMTV NEWS REPLAY	
4:00 PM G 2014 NRL - ROUND 25	5:30 AM G EMTV NEWS REPLAY	6:30 AM G TODAY	9:30 PM PG MERLIN SEASON 4 - EP#2/13
SEA EAGLES vs. PANTHERS	6:00 AM G TODAY	Join Karl Stefanovic, Lisa Wilkinson and the team as they bring you the	10:30 PM G EMTV NEWS REPLAY
6:00 PM G EMTV NATIONAL NEWS	09:00 am G CLASSROOM BROADCASTS		
6:30 PM G VOCAL FUSION SEASON 1 -	3:30PM G KIDS KONA		
TOK PIKSA - EP#37/2014			

Oi Progam na Kilok i ken senis oltaim...

Ol poto long Yunivesiti ov PNG Open De long las Fraide Ogas 22, 2014. Ol Poto : Veronica Hatutasi



TI TEBOL: Trensperensi Intanesenel (TI) i bin gat tebol long UPNG Open De. Planti sumatin i bin raun long dispela tebol na kisim infomesen long ol woklain i lukautim ol tebol na ol liklik buk long kisim moa save.



THE NATURE CONSERVANCY (TNC) : Ol sumatin i lukluk raun long tebol bilong TNC, wanpela NGO i wok long lukautim ol solwara, rif na ol pis, trausel, ol sel na ol narapela abus bilong solwara na ol lain i kam bihain i ken lukim, amamas na yusim ol. Dispela NGO i mekim bikipela wok long Is Nu Briten, Manus, Madang, Milen Be na ol nara-pela hap moa.



GLASIM: Tupela UPNG meri sumatin i kisim pinis ol liklik infomesen buk long ol liklik tebol bilong ol NGO i putim aut na glasim i stap.

Raun wantaim Kanage olgeta wik



Mi gat hevi na mi laikim helpim

Dia Laipain,

PAPAMAMA bilong mi i dai pinis sampela krismas i go pinis long birua bilong kar long narapela provins.

Olsem na liklik brata bilong papa bilong mi i marit long narapela provins i bin kisim mi taim mi liklik yet na i gat 8-pela krismas tasol na ol i lukautim mi. Nau mi gat 21 krismas na mi wokim namba tu yia skul bilong mi long wanpela teseri institusen long kantri. Long lukluk bilong mi, sampela senis mi wok long lukim i narakain na i no olsem bipo taim mi liklik we mi bin stap amamas na groap.

Anti na ankle bilong mi i save komplem olgeta de na tromoim ol toktok long ol samting mi no mekim. Na mi no amamas long dispela. Mipela i save go lotu long Pentekostel Sios olgeta Sande tasol dispela i no helpim wari mi gat long em. Taim ol dispela samting i wok long kamap, kasen brata bilong anti bilong mi i bin reipim mi. Dispela i bin kamap wanpela moning taim olgeta hauslain i bin go aut na lusim mitupela tasol long haus. Em i wokim strongpela toktok long banisim mi long noken tokaut long dispela samting. Sampela wik bihain, mi bin go sekap long dokta na painimaut olsem mi gat bel. Mi wan na haf mun pinis. Mi pret long tokaut long dispela long tupela was papamama bilong mi.

Bai mi mekim wanem nau? Mi laikim sampela stiatok sapos mi rausim bebi long bel o lusim i stap.

SCARED TO TELL

Dia Pren,

MIPELA i wok long harim na long wankain taim tu, kisim planti pas na ol telepon kol long ol yangpela na moa yet, long ol meri husat i bungim dispela kain hevi. Mipela i sori na i no pilim gut long dispela samting we i wok long kamap long planti ol yangpela pikinini meri bilong yumi long dispela kantri.

Nambawan, mipela i laik tok tenkyu long dispela was papamama husat i kisim yu na lukautim yu taim trupela papamama bilong yu stret i dai. Yu



tok tupela i bin kisim yu taim yu lukluk yet wantaim 8-pela krismas taim papamama stret i dai na yes, yu bin amamas groap wantaim was papamama. Nau yu stap long wanpela bikipela skul long kantri tasol yu no save watpo was papamama i sutim tok long yu, maski yupela i save go long lotu. Tasol wanpela hauslain i reipim na bagarapim yu na yu gat bel nau long haus we yu groap long en. Na nau yu sori i stap.

Pren, mipela i laik bai yu luksave olsem yu stap insait long hevi nau. Sampela taim, kain situesen i save kam insait bikos ating yumi larim dua long em i kam insait. Dispela samting i kamap long yu na i ken kamap long ol narapela yangpela meri, maski yu stap wantaim bubu meri bilong yu na ol was papamama o ol lukaut papamama. Mipela i strongim yu olsem yum mas toktok long wanpela famili memba long hevi i kamap long yu. Mipela i bilip olsem ol papamama i gat rait long save. Yu tok pinis olsem ol (was papamama) i wok long komplem na sutim tok long yu. Yu ting ol bai amamas sapos yu haitim long ol na ol i harim long bihain taim?

Mipela i laik tokim yu olsem taim yu tokim tupela papamama long hevi yu gat long em, ol i ken senisim pasin bilong ol long yu. Yu ting olsem papamama em ol i as long dispela hevi i kamap long yu? Mipela i strongim yu long pogivim ol na askim yu long wokim ol plen long bihain taim bilong yu na pikinini bilong yu.

Yumi olgeta i save mekim mistek o asua na lainim long ol. Na mipela i laikim yu long go het long laip bilong yu bikos mipela i bilip olsem dispela em i rot long bihainim, na noken wari tumas long situesen bilong yu. Mipela i save olsem yu no bin ripotim dispela samting long polis, tasol yu mas gat

as tingting bilong yu yet long i no mekim dispela.s

Yu toktok long rausim bebi, tasol pren, Laipain i no wanbel long dispela bikos em i egensim lo bilong Bikipela na tu, lo bilong kantri. Sapos yu no klia long ol rait bilong yu o yu pret long toktok wantaim papamama bilong yu, go long Welfea opisa o Kaunseling Ogenaisesen klostu long yu. Tu, i gat Helpim Desk long planti Polis stesen long kantri. Ol opisa long long ol opis na ol ogenaisesen bai helpim yu etresim hevi yu gat long em.

Mipela i stap long helpim yu sapos yu laik toktok long mipela. Yu ken ringim mipela long telepon namba 326001/3263138/3405832.

Mipela i enkarijim yu long noken bagarapim bebi long bel na tu, go het skul bikos yu tingim, edukesen bai helpim yumi long gutpela bihain taim bilong yumi. i moabeta yu belgut wantaim papamama bilong yu pas taim. Na wantaim papamama bilong yu, toktok long man i bin reipim yu.

Mipela i strongim yu long go long sios yet wantaim was papamama bilong yu nay u ken gat lewa bai i laik pogivim narapela, laik pasin na harim tok. Na Papa Antap em Prins bilong Pis bai lukautim na stiaim yu long laip bilong yu. God i laikim yumi long harim tok olsem ol pikinini bilong em. Ritim Baibel bilong yu long Di-utronomi Sapta 26 Ves 16-18.

Mi Pren bilong yu, Laipain

Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.

Laipain

LNG bai pulim K20 bilien winmani

Stanley Nondol i raitim

PRAIM Minista Peter O'Neill i tok PNG LNG i salim LNG gesigo aut long maket, 12 pelataimpin- isnabaipulim moa long US\$ 30 bilien long 20 pelaraun.

Na wok bilonggavman long stretim gut lo bilongmenesimnagivimsevis long kantri.

Mista O'Neillasteitokim-palamenolsemkantrii salimges 12-pela raunpinis. Na baipulim US50 milien long wanwansipmen.

Em i tokkantri i no kismwinmaninaskelim yet long dispelayiatasol moa winmanibaikaminsait long basetbilonggavmantaim-palamenioraitimbi long SovrenWel Fan (SWF) bilongmenesimmani.

Projekdivelopa, ExxonMobil imenesimwinmanibilong LNG projeknaMista O'Neill i tokolwinmanibilong 12-pela sipmen i stapseif.

MistaO'Neill i tok LNG projekem i bikpelaprojeknabikpelawinmanibai i kaminsait long givimgutpela-sevis long kantri long helt,



Sip karim LNG kago go aut long wolmaket.

edukeseninfrastraksa, lo naodanaolarapela.

Long wankaintaimtu, membabilongKandep, Don Polye i tokkantrib-aiyusimwinmanibilong PNG projek long bekim UBS dinau. Na em i askimMista O'Neill long tokkia long kantri long winmanibilongdispelayia.

MistaPolye i tokolwinmanibilong LNG projekbai go stret long bekim UBS K3 biliendinau we gavman i kism long baimbek 10.1 pesen sea long Oil Search Limited.

MistaPolye i tokkantribaik- isimsevis long winmanibi- hain long sampelamoa yia, taimgavmanipinis long beki- moldinaumani, na i no kwik- taimolsempraimministaitokbi hain long kantrisalimnam- bawanges i go long Japan.

Rot PraimMinsista O'Neill i go kism UBS dinau i no stret. Milukimolsememiasua long sainimtaim mi bin stap- ministabilongTreseriolsem- naemirausim mi long wok minista.

MistaPolyeitokgavmani- sainimlonagrimennataitaim LNG winmani long bekim

UBS dinaunaplantiloapraim- minista i brukim long sain- imdispeladinau we LNG winmanibaibekim.

MistaPolye itokPraimMin- ista O'Neill i mas tokstret long 7.8 milienpipelbi- longkantri long wanemtaim- stretolpipelbai stat long kismsevis long winmanibi- long LNGprojek.

MistaPolye i tok rot gav- manilaikkamapimSovrenWel Fan long menesimwinmani- bilong LNG inostert.Emitok SWF i mas kamapna wok, pastaim long kantrii salim- gesi go aut.

Ikonomi bilong PNG i gro strong long Esia

Stanley Nondol i raitim

BISNIS bilong kantri i gro i go antap moa long Esia, na wan- pela ripot bilong ANZ i tok PNG risos sekta i ken pulim winmani long ol ekspot 4-pela taim moa long mani mak bi- long US 23 milien dola long wanwan yia long 2030.

ANZ Grup CEO, Mike Smith long Pot Mosbi las wik i tok kantri i ken pulim US\$ 112 bilien long kapital inves- men.

Mista Smith long toktok bi- long em i go long Pot Mosbi Semba bilong Komes i tok em i gat bikpela bilip long bi- hain bilong kantri bikos kantri i gat planti risos na i gro go antap moa long Esia.

ANZ ripot tu i tok i gat nid long kantri i mas gat long tem balens gro long ol naturel risos, infrastraksa na egrikalsa sekta.

Dispela ripot i tok i gat salens long kantri i mas luk- luk long PNG i wok hat long stap strong long kompetisen o resis insait long wol. Na i gat nid long stretim ol infra- straksa i go bungim wol klas stendet na wok strong long apim egrikalsa komoditi ekspot long wol maket.

"Long Esia Pasifik rijon,

kantri i lukim pinis strongpela tred i kamap long mani mak bilong US\$1.7 bilien long 2000 i go klostu long US \$ 10 bilien long 2013", Mista Smith i tok.

Mista Smith i tok dispela i soim olsem PNG i holim planti maket pinis long Esia. Tasol i gat gep o hul i stap yet long maket bilong nau na ol sans bilong kism moa bisnis long Esia.

Em i tok moa olsem bihain bilong kantri bai kamap gut na bai gat rekot long ol bikpela projek i wok long kamap. Long helpim bihain bilong PNG i kamap gut, i gat nid long helpim ol projek di- velopa long stretim ol infra- straksa na stretim ol lokol komyuniti, ol papagraun grup na gavman.

Gutpela rot o trenspensi bilong kantri i namba wan na bikpela lukluk i mas kamap long menesim gut ol projek bai helpim bihain bilong kantri.

Dispela em ol hatpela wok, tasol i gat rot long banisim kantri long lukluk i go het wantaim gutpela tingting long menesim gut gavman, bisnis, na komyuniti bai lukim kantri i gro moa, na pipel bai kism ol gutpela sevis long ol bisnis.

Bmobail Vodafone na BSP i sainim onlain topap

BMOBAIL Vodafone na BSP i tokuat olsem tupela i sainim agrimen long givim e-komes sevis bilong onlain topap long mekim isi long bmobail Voda- fone kastoma wantaim BSP VisaDebit kad o BSP Koporet Masta Kad Debit kad kas- toma long mekim onlain topap .

O lain topap bilong dispela bai kamap kwiktaim long givim kastoma isi sevis .

Kastoma husat i rejista long bmobail Vodafone namba long self Ke akaunt long www.bmobile.com.pg bai lukim wanpela link [http://selfcare.bemobile.com. pg/Care/Login](http://selfcare.bemobile.com.pg/Care/Login) . Dispela i soim rot bilong mekim darek onlain pemen na ol kastoma i ken makim amas mani ol i laik topap.

Grup Sif Eksketiv Opisa bi- long Bmobail Vodafone, Sun- dar Ramamurthy i tok ol i kamapim dispela long givim

gutpela sevis bilong tupela patna kampani wantaim 3D Kod.

"Mipela i amamas long kamapim patnasip wantaim BSP long PNG na helpim ol kastoma long yusim dispela sevis 24 huaa olgeta de.Mipela i lukluk long kamapim moa nupela sam- ting long givim gutpela sevis long kastoma", Mista Rama- murthy i tok.

Mista Ramamurthy i tok, "BSP i komited long divel- opmen bilong e-kpmes long Papua Niugini na dispela pat- nasip i gutpela long patnasip mipela i gat pinis long Mobail na intanet benking wantaim nupela Mobail benkingng mipela i lonsim pinis.

Dispela e-komes solusen em i wanpela rolaut bilong bmobail Vodafone ilektronik Visa Distribusen (EVD) Teblet Solusen bilong olgeta bikpela ritel stoa long kantri.

Pan Aust kism 80 pesen long Frieda Riva projek

PANAUST Limited i tokaut olsem em i baim 80 pesen bilong Frieda Riva Kopa-Gol projek long Is Sepik provins.

Kampani i tok olsem dis- pela baim bilong projek em i bikpela samting tru kampani i mekim, na nau em i bikpela projek bilong kam- pani.

Kampani i tok Frieda Riva i gat bikpela kopa diposit i stap, na kampani i amamas long kism sans na bai mekim wol klas operesen.

Menesing Darekta bilong PanAust, Gary Stafford, i tok kampani i amamas long wok long Papua Niugini.

"Mipela i gat bikpela amams long mekim inves- men long Papua Niugini, na

tok tenkyu long kism sans long divelopim Frieda Riva projek. PanAusta wantaim join vensa kampani, Hailens Pasifik i lukluk long wok hat long kism dispela projek i go long produksen," Mista Stafford i tok.

Hailens Pasifik em i wan- pela kampani ol i kamapim long PNG na i gat 2- pesen sea long projek, na gavman bilong PNG i gat rait long kism 30 pesen sea.

Menesing Darekta bilong Hailens Pasifik John God- ding i tok welkam long PanAust, na i lukluk long wok bung wantaim long divelopim projek wantaim sapot bilong papagraun, provinsal na nesnel gav-

man.

Dispela em i wanpela bikpela divelopmen bilong Frieda Riva projek. PanAust na Hailens Pasifik i gat bikpela bilip na laik long wok long projek na divelopim i go long ful produksen.

Frieda Riva kopa-gol di- posit i stap long boda bilong Sandaun na Is Sepik Provins, na em i gat wankain jiograpi eria olsem wanpela main eria long kantri we PanAust bin divelopim tupela bikpela main pinis.

Pan Aust em i wanpela Australia beis kampani kopa na gol produsa, na i save mekim planti maining

wok long ol hatpela ples.

Kampani bai yusim ol wok eksperiens bilong em long Laos long konstruk- sen, menesmen, na opere- sen bilong main, na i gat strongpela stended na rekot long wok gut wantaim komyuniti na gavman long planti ol kantri.

Pan Aust i bin kism planti luksave o intanesenel awod pinis long ol wok em i save mekim long komyuniti. i no long taim i go pinis, kam- pani i bin winim 2013 Sas- tenabel Lidasip Awod long Esia Maining Kongres we ol i givim luksave long PanAust olsem em i gat strong long divelopim ol projek.

Travel Tips

Be a wise traveller



1. Book Flights early



2. Quote your Destinations Loyalty Program or Executive Club Member numbers at the time of booking.



3. Check your ticket for the flight details before you leave the office.



4. Check in 2-3 hours before your departure time. Check in counters close 45 minutes before departure.



5. Excess baggage - baggage over 16kgs (Dom) & 23kgs (Int'l) will be charged.



6. Boarding Gates close 15 minutes before the scheduled departure time.



7. Check in Online. Avoid queues at the counter. www.airniugini.com.pg



8. If your online check in successful, take your baggage to the airport and check them in.



Ol Mama Long Ramu Projek Eria kisim Wol Benk Helpim wantaim 3-pela Nupela Trak na Piggeri Projek

TUPELA wimen grup insait long Ramu NiCo Projek long Madang provins long Tunde i sainim ol pepa long kisim tupela nupela trak long helpim ol long agri-bisnis wok bilong ol meri.

Dispela em wanpela bikpela histori stret we i no bin kamap bipo. Dispela helpim i kamap bikos long stap bilong Ramu NiCo Projek we MCC i sanapim long Madang provins.

Ol lain i makim KBK women grup na Inlen Paiplain (Maigari) wimen grup i bin sainim ol pepa fran long Tim Lida bilong GRM Intanesenel, Ronel Fourie, husat em wanpela konsalten bilong Wol Benk long redim rot long tupela nupela kar ol mama bai i kisim.

Dispela spesel saining i bin kamap long Usino LIG kaunsil semba long Usino stesen.

Dispela tupela mama grup i stap namel long 4-pela mama grup insait long Ramu Projek eria husat bai kisim helpim i kam long Wol Benk aninit long progrom ol i kolim Wol Benk Maining Sekta Institusinel Strentening Teknikol Asistens Projek 2.

Ol mama insait long Ramu Projek eria i bin givim 4-pela aplikesen na olgeta 4-pela wantaim bai kisim helpim. Dispela i kamap bikos long helpim bilong Ramu NiCo (MCC) Jenda opisa, Agatha Yombai na tupela lain i stretim ol pepa wok em agrikalsa sastenabiliti opisa Allan Wahwah na Bisnis Dvelopmen Opisa, Brodney Seip.

Tim lida ilong GRM Intanesenel, Mis Fouri wantaim ol opisa bilong Mineral Risoses Atoriti (MRA) na wanpela opisa bilong Komes na Industri, Elizabeth George i bin ron long kar long Madang i go long Usino stesen long sainim agrimen.

Naispela welkam stret i wetim ol we i lukim 4-pela singsing grup bilong ol Maigari i bilas na paitim kundu na samsam stret long bringim ol i go long ples bilong sainim agrimen.

Planti ol mama blong KBK na Maigari i amamas tru bikos dispela em histori na namba wan taim tru bilong wanpela bikpela ogenaesis olsem Wol Benk i luksave na helpim ol mama long Ramu Projek eria long Madang provins.

Mis Fouri bilong GRM Intanesenel i tok olsem dispela projek em bilong olgeta lain long komyuniti long kisim helpim long en. Na em i tok ol mama i mas tok tenkyu long ol lida meri husat i go pas long mekim dispela samting i kamap.

"Em i kisim sotpela taim tasol bihain long mipela i miting long mun Mas 2014 na wantaim helpim bilong MRA, Ramu NiCo Jenda opisa na stiaring komiti, nau mipela i sainim agrimen long yupela bai kisim ol projek," Mis Fouri i tok.

Dispela grent helpim bilong Wol Benk i go long ol Ramu Projek eria i kam aninit long Nesenel Gavman Asistens Skim grents i go

long ol meri long eria we maining operesen i stap long en.

Tupela narapela wimen grup em Kostal Paiplain wimen grup husat bai kisim wanpela trak na ol Basamuk Wimen Grup husat bai kisim wanpela pigeri projek,

Dispela seremoni long Usino stesen i kamap nais tru taim ol mama i givim toktok na tenkyu long Jenda opisa bilong Ramu NiCo na tu MRA na bikpela tenkyu long Wol Benk long givim mani helpim long ol.

Presiden bilong Usino LIG, Joseph Kumun i bin stap long lukim seremoni na i tokaut long komitmen long givim K5,000 long sapatim wok bilong Maigari wimen asosesin.

Deputi Siaman bilong KBK Lenona Asosesin (LOA), Diri Movikai i tokaut olsem Kurumbukari na sampela ples long Usino eria i bin stap long bikpela bus na nogat developmen long en stret, inap Ramu NiCo (MCC) i bin kam na kamapim developmen. Taim MCC i kam kain kain helpim i go long go insait long Usino-Bundi eria na dispela em wanpela long ol kain nupela developmen o helpim i go long ol wimens grup.

Mista Movikai i salensim olgeta meri na ol mama long wok bung wantaim na noken salens tumas long ol posisen insait long asosesin. Ol i mas wok long gutpela blong olgeta mama na meri long ples na i no intares bilong ol yet.

Meri makim KBK Wimen grup Maria Garima i sainim agrimen blong Wol Benk helpim na tupela arapela i lukim.



Ol mama bilong KBK i soim agrimen pepa.



Ol Inlen Paiplain wimen grup i soim setifiket wantaim Tim Lida blong GRM Intanesenel Ronel Fouri.



GRM tim lida Ronel Fouri i guria tru long naispela welkam ol singsing grup bilong Maigari i mekim long Usino stesen.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 bilian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komuniti'

Somil bai helpim ol pipel long Nakanai LLG

...Muthuvel sapatim egrikalsa na rurel pipel

KLOSTU 30,000 bilong Sentrel Nakanai Lokol Level Gavman Kaunsel (LLG) eria long Wes Nu Briten bai kisim gutpela helpim wantaim wanpela somil gavana bilong ol, Sasindran Muthuvel i givim.

Ripot i kam long opis bilong gavana i tok Gavana Muthuvel i bin baim Lucas Mil Somil wantaim mani i kam long Provinsel Sevis Impruvmen Program (PSIP) bilong em.

Ol bin givim dispela somil i go long Sentrel Nakanai LLG long taim bilong wanpela yia anivesari selebren bilong dispela nupela LLG we planti Sentrel Nakanai pipel i bin kamap long en.

Opis bilong Gavana i tok em i bin givim nupela somil i go long nupela LLG long helpim ol i wokim timba long busgraun bilong ol yet.

Gavana Muthuvel i tok Presiden bilong Sentrel Nakanai, Francis Kevin i bin toktok wantaim em bikos em i lukim olsem i gat bikipela nid long timba bilong yusim long strongim wok long LLG bilong ol.

Ol bai yusim ol timba long wokim ol klasrum na skul biling bilong tupela praimer skul na 32 elementeri skul long Nakanai LLG eria.

Opis bilong Gavana i tok dispela projek em LLG Sevis Impruvmen Program (LLGSIP) na PSIP i bungim mani wantaim na fandim.

Opis i tok ol bai yusim dispela somil long inapim ol plen long biling ol komyuniti hal long ol wan wan LLG, ol maket haus, ol bas stop long ol haiwe rot, ol sios biling na karimaut ol wok mentenens long ol klasrum na ol haus tisa.

Opis bilong Gavana i tok tu olsem ol bai yusim somil ya long bildim ol edministrativ opis long ol LLG hetkwata.

Opis i tok ol timba w ol i no yusim em ol bai salim long kamapim mani bilong ol LLG.

Long wankain taim, Gavana Muthuvel i baim tripela Mini Kokonas Mil" o ol mesin bilong mekim kokonas oil o wel long Wes Nu Briten Provins, na ol i stap long eria bilong provinsel gavman opis.

Opis bilong Gavana Muthuvel i tok ol i baim ol dispela mesin long promotim sastenebol egrikalsa na tu, long strongim ol pipel long ol rurel eria long mekim mani long ol kes krop ol i groim.

Kos bilong wan wan mesin em long K80,000 na long tripela, kos em

K240,000. Ol bai trenim ol man long ranim ol dispela mesin.

Gavana Muthuvel i tok ol bai givim ol dispela mesin long ol ples we i gat pawa bikos mesin i yusim pawa long ran long en long kresim ol kokonas na kamapim kokonas wel.

Em i tok bihain long ol i traime ol dispela mesin, em bai kisim ol mesin we i ran long disel bilong yusim long ol rurel eria.

Provinsel Liesen opisa bilong Kopra Kokonads Institute m Peter Nguna i gat intres long ranim trening.

Ol i mas stretim d Dispela Wel Pam Mini Mil i bin kam wantaim Kokonas Mil em ol i mas stretim na testim.

Long las wik, ol i bin stretim Mini Kokonas Mil mesin na ol i testim long provinsel gavman eria.

Buin pipe kisim donesen long Yamamoto Asosiesen

OL PIPEL bilong Buin long Saut Bogenvil i ken mekim gut wok long klinim ples, ol gaden kakao na wokim ol haus na tok tenkyu i go long Yamamoto Asosiesen bilong Japan.

Tupela wik i go pinis, Embaseda bilong Japan long PNG, Hiroharu Iwasaki i bin givim 5-pela senso na 5-pela bus kata i go long Presiden bilong Atonomas Rijen bilong Bogenvil, Dokta na Sif John Momis long Mosbi.

Yamamoto Asosiesen bilong Japan i bin kisim wanpela askim i kam long ol pipel bilong wanpela ples long Buin we balus bilong Masal Admiral na Sif Komanda bilong Kombain Pasifik Flit, Isoroku Yamamoto em

bos bilong ol Japan Ami long bikipela pait i bin kamap

long Pasifik moa long 70 krismas i go pinis em Wol Woa 2, i bin kres na pun-daun long 1943, na bikman i bin dai.

Balus bilong Yamamoto i stap yet long dispela viles long Buin.

Bipo long Bogenvil hevi, ol i save lukautim gut hap we balus i stap long en. Na planti lain bilong Japan na ol turis i save raun i go lukim, tasol long taim bilong hevi, pipel i bin ranawe lusim ples na i bagarap.

Nau ol i laik klinim na sanap gut gen ples we ol turis i ken go lukim.

Wantaim dispela donesen bilong ol senso na bus gras kata, ol pipel bai stretim ples we i gat histori long em bikos Admiral Yamamoto i bin bosman bilong ol Japan Ami long Pasifik long Wol Woa 2.



PRISENIM: Gavana Sasandran Muthuvel na lain bilong em i prisenim Luca Somil i go long bikman bilong Nakanai LLG, Kevin Francis. *Poto: Gavas Midia Opis*



Embaseda Hiroharu Iwasaki i givim wanpela senso i go long Presiden bilong Atonomas Rijen bilong Bogenvil, Dokta na Sif, John Momis.

Mista na Misis Momis, Dokta Joe Bana Koiri na Albert Nukuitu i makim ol pipel bilong Buin long kisim ol donesen i kam long Embaseda Hirohary Iwasaki na Tatsuro Tomita bilong Pacific International (long lefhan). *Ol Poto: Embasi bilong Japan*



Envairomen pestri winim resis

KUK, bek na samap i ken helpim tu long wok bilong lukautim envairomen na graun, olsem dispela wok bilong wanpela winman sef o kukman bilong kantri Taiwan i soim.

Kuk Chen Li-che i save wokim ol pai (pie) na ol arapela pestri i bin winim wol pestri resis wantaim kuk wok bilong em i soim olsem em i bikipela samting long lukautim envairomen.

Olsem piksa i soim, Mista Che i gat 36 krismas i bin winim namba wan prais long namba wan Global Pestri salens bilong ol kuk i bin kamap long kantri Norway long Yurop.

Che em,"The 3-D Reflection of Deep Blue Ocean em pestri bilong kaikaim we i soim wanpela hambek weil i sam aut long piksa frem i gat solwara sef i wokim long suga.

Tingting bilong Chen long wokim dispela pestri em i laik soim ol pis na ol animal we i laik bruk lusim envairomen ol i stap long en bikos man i wok long bagarapim.

Flouting piksa frem em wanpela liklik deset o ples i waisan em i kolim long "Swashing Melody", em wanpela soklet kek em bin wokim long ol banana ol i groim yet long Taiwan. Laspela samting long pinisim pestri em "Taiwan 17" em wanpela aiskrim diset ol i

bilasim wantaim Namba 17 painap em i sanapim namel long tupela.

Ol bin givim 10-pela awa tasol long ol manmeri i stap insait long resis long pinisim olgeta wok bilong ol.

Mista Che i bin winim 6-pela top sef o kuk i kam long United Arab Emirate, Costa Rica, Czech Republic, Finland, Cyprus na New Zealand long kamap namba wan pestri kuk long wol. Wol Asosiesen of Sefs Sosaiti we i bin ogenaisim resis em i wanpela global netwok asosiesen ol bin statim long Paris, Frans long yia 1928 i makim 10 milien sef bilong 100 kantri.



WINA PESTRI: Wok bilong Sef Chen Li-che em wanpela sef o kuk bilong Taiwan i winim wol pestri kuk resis.

Tim ENB i redi long PNG Gems

Michael Novingu i raitim

WOK redi bilong Tim Is Nu Briten (ENB) i stat pinis long Kokopo. Dispela wok redi em long go pilai long namba 6 PNG Gems long Lae long nun Novemba.

Provinsel Spots Kodineta, Emmanuel Laplapir, i tok olsem ol wok redi i ran gut tasol na em i amamas long lukim ol spot manmeri i redi.

Mista Laplapir i tok tim ENB bai pilai long 27-pela spot long PNG Gems. Sampela bilong ol dispela spot em swimming, darts, tas Ragbi, ragbi sevens, softbal, na ol arapela.

Em i tok Tim ENB i redi long pilai strong long winim bek taitol. Tim ENB i bin winim namba 5 PNG Gems long 2012 taim ol i bin hostim.

Mista Laplapir i tok ol i painim planti spot manmeri long ol rurel eria husat i gat talen long pilai ol spot, na ol i kisim ol i go long Kokopo long treading.

"Planti bilong ol spot manmeri bilong mipela em ol sumatin bilong ol Hai Skul na Sekenderi Skul," Mista Laplapir i tok.

Em i tok ol i laik yusim ol dispela yangpela spot manmeri bikos ol i ken kamap ol gutpela spot manmeri long

taim bihain, na tu, makim kantri long ol bikpela spot pilai long Pasifik na long wol.

"Nau yet mipela i wok long helpim ol spot manmeri bilong mipela long mekim medikol sek ap, stretim ID bilong ol, na lukim olsem ol i redi long go pilai long PNG Gems," Mista Laplapir i tok.

Aplikesen bilong ol spot manmeri husat i laik stap insait long Tim ENB bai pas long laspela de bilong dispela mun.

Mista Laplapir i tok tim ENB i nogat wari, na tim i redi pinis long go na pilai wantaim trupela spirit bilong PNG Gems.

Hunters makim Minoga long kisim awod

PNG Hunters i makim uutiliti pilaia bilong ol, Willie Minoga, long kisim People's Choice Award bilong Intrust Super Cup.

Sif Eksekutiv Opisa (CEO) bilong PNG Hunters, Brad Tassell, i tok i gat ol arapela pilaia tu i stap we ol i bin laik makim tasol ol dispela arapela pilaia bai resis long kisim ol arapela awod olsem na ol i makim Willie Minoga.

Intrust Super Cup i bin askim olgeta tim insait long kompetisen long makim wan wan pilaia long resis long kisim People's Choice Award.

Ol manmeri husat i laik vot bai mas go long intanet na go long websait bilong

Intrust Super Cup na putim vot long husat man ol i laikim long kisim awod. Voting i stat pinis long stat bilong dispela wik.

Wina bilong dispela awod bai kam aut long neks mun long wanpela bung we bai kamap long Brisbane long Australia.

Mista Tassell i tok dispela em sans bilong olgeta sapota bilong ol Hunters long putim vot na helpim Willie Minoga long winim dispela awod.

Ol arapela tupela pilaia bilong Hunters husat i gat bikpela sans long winim ol arapela awod em kepten Israel Eliab, na winga Garry Lo.

Eliab i gat sans long



Willie Minoga bilong PNG Hunters.

kisim Player of the Year, na Garry Lo i gat sans long kisim Top Try Scorer of the Year.

Vot bilong People's Choice Award bai pas long Septemba 7.

Kosa bilong PNG Mosquitoes i amamas tru

Isaac Liri i raitim

WANPELA man husat i gat bikpela amamas long bel bilong em long dispela taim em kosa bilong AFL semption tim, PNG Mosquitoes.

Andrew Cadzow i tok hat wok bilong ol pilaia bilong em i karim kaikai.

"Ol mangi i bin pilai wantaim pret bikos Ireland i bin putim bikpela presa antap long mipela long namba wan na namba tu kwata."

"Ol mangi i bin pilai olsem

tim na helpim ol yet insait long ples bilong pilai." Kosa Andrew Cadzow i tok.

Em i tok olsem em i no bin isi long winim Ireland, long wanem, Ireland em wanpela strongpela AFL kantri, na level bilong ol long pilai dispela spot em i antap.

Em i tok dispela win i soim ol arapela kantri long wol olsem Papua Niugini i no kantri nating, na Papua Niugini i gat nem long dispela spot.

"Sampela pilaia bilong mi

i bin kisim bagarap, tasol ol mangi i no bin larim dispela i stopim ol long winim taitel na mi amamas tru long ol," Kosa Andrew Cadzow i tok.

Mista Cadzow i tok bikpela tenk yu i go long ol sponsa, Moto Vehicle Insurance Limited (MVIL), National Gaming Control Board (NGCB), ol famili bilong ol pilaia, na ol pipel bilong Papua Niugini long Australia husat i bin givim taim bilong ol long kam na sapotim tim.

Medikol Komiti bilong Pasifik Gems i redi

LONG taim bilong 2015 Pasifik Gems, ol medikol manmeri i save mekim bikpela wok long lukautim ol spot manmeri taim ol i pilai spot.

Man husat bai go pas olsem lida bilong Medikol Komiti bilong 2015 Pasifik Gems em Profesa Nakapi Tefuarani. Profesa Tefuarani em Eksekutiv Din bilong Skul ov Marasin Helt Sevis long Yunivesiti ov Papua Ni-

ugini (UPNG), na tu, em Presiden bilong Medikol Sosaiti bilong PNG.

Man husat bai stap olsem deputi o namba tu man bihain long Profesa Tefuarani long dispela komiti em Dokta Sam Yockopua.

Ol arapela memba bilong dispela komiti em Dokta Bernie Amof, Dokta Gideon Kendino, Dokta David Inaho, Dokta Lucy John, Lydia McCathy Pulotu, Dokta Michael

Wilson, St Johns Ambulance, Pot Mosbi Jenerel Haus sik, NCD Helt, Nesenel Dipatmen ov Helt, na tu, ol arapela praivet ogenaesen.

Wok bilong Medikol Komiti em long lukim olsem ol spot manmeri i kisim gutpela medikol sevis long taim bilong pilai. Ol sapota na ol arapela opisal bai kisim medikol sevis tu sapos ol i painim o kisim bagarap.

- Ol Wiken Spot Dro -



Raun 7 Dro

Sarere 30 Ogas 2014

Field 1

Time	Division	Team	Team
0800	U19B	FC Wantoks	v PNGIPA SOG FC
0900	U19B	Murat FC	v FC Amoana Revivals
1000	D1W	Dept of Labour & Industrial Relations	v MorataComm FC
1100	BLW	Matrix United FC	v Morobe United FC
1210	ALW	FC Wantoks	v PNGIPA SOG FC
1320	ALM	Murat FC	v FC Amoana Revivals
1440	D1M	Bau Foots FC	v NamoSouths FC
1620	ALM	FC Wantoks	v PNGIPA SOG FC

Field 2

Time	Division	Team	Team
0800	D1W	Kaza United FC	v Masters FC
0900	BLW	Zuringi Youths FC	v Bali FC
1000	D1W	Bau Foots FC	v NamoSouths FC
1100	ALW	Murat FC	v FC Amoana Revivals
1210	D1M	Dept of Labour & Industrial Relations	v MorataComm FC
1320	D1M	Kaza United FC	v Masters FC
1440	BLM	Zuringi Youths FC	v Bali FC
1620	BLM	Matrix United FC	v Morobe United FC

Field 3

Time	Division	Team	Team
0930	U15G	FC Wantoks	v PNGIPA SOG FC
1020	U15G	Murat FC	v FC Amoana Revivals
1110	U17G	FC Wantoks	v PNGIPA SOG FC
1220	U17B	Murat FC	v FC Amoana Revivals
1320	U17B	FC Wantoks	v PNGIPA SOG FC
1420	U17G	Murat FC	v FC Amoana Revivals



Raun 7 Dro

Sande 31 Ogas 2014

Field 1

Time	Division	Team	Team
0800	U19B	Buria FC	v ITI Musa United FC
0900	D1W	Team Treasury	v Auditor Generals Office FC
1000	BLW	Simla FC	v Oro United FC
1100	ALW	Buria FC	v ITI Musa United FC
1210	BLM	Simla FC	v Oro United FC
1320	BLM	Bali FC	v Bao GYs
1440	ALM	Buria FC	v ITI Musa United FC
1620	ALM	City United FC	v Valley Strikers FC

Field 2

Time	Division	Team	Team
0800	U19B	City United FC	v Valley Strikers FC
0900	BLW	Bali FC	v Bao GYs
1000	D1W	NasVIII FC	v Nagavas FC
1100	BLW	Souka Drifters FC	v Zuringi Youths FC
1210	ALW	City United FC	v Valley Strikers FC
1320	D1M	NasVIII FC	v Nagavas FC
1440	BLM	Souka Drifters FC	v Zuringi Youths FC
1620	D1M	Team Treasury	v Auditor Generals Office FC

Field 3

Time	Division	Team	Team
0930	U15G	City United FC	v Valley Strikers FC
1020	U15G	Buria FC	v ITI Musa United FC
1110	U17G	City United FC	v Valley Strikers FC
1220	U17G	Buria FC	v ITI Musa United FC
1320	U17B	City United FC	v Valley Strikers FC
1420	U17B	Buria FC	v ITI Musa United FC

BYE

NO	DIVISION	CLUB
1	DIVISION ONE	BagitaPascols FC
2	B-LEAGUE	NiuLukBaos

Sekyuriti long Digicel Kap gren fainel bai strong

Isaac Liri i raitim

SIAMAN bilong Papua Niugini Nesanel Ragbi Lig (PNGNRL), Sudir Guru, i tok sekuriti long lukautim Digicel Kap gren fainel long dispela wiken bai strong, na ol manmeri husat i bikhet bai kisim mekim save long ol polis na ol arapela sekuriti.

Siaman Guru i tok bikos ol Hela Wigmen i bin laikim long surukim gren fainel i kam long Lae, ol bai helpim long givim sekuriti long dispela bikpela pilai.

Em i tok ol lida bilong Hela provins olsem Anderson Agiru na James Marape i toktok wantaim PNGNRL pinis na bai helpim long

lukim olsem sekuriti i strong, na dispela pilai i kamap gut.

PNGNRL yet bai go pas long givim sekuriti wantaim helpim i kam long ol spona olsem Digicel na SP Brewery.

Siaman Guru i tok ol sekuriti na polis bai glasim gut olgeta manmeri husat i

go insait long ples bilong pilai long Lae na ol bai rausim ol manmeri husat i laik karim bia i go insait long ples bilong pilai.

"200 polis man na 150 sekuriti bai stap long ples bilong pilai long helpim long kontrolim ol manmeri na mekim pilai i ran gut na pinis gut," Mista Guru i tok.

Yangpela swima kisim nupela rekot

COLLIN Akara bilong Milen Be na Sentral provins husat i gat 18 krismas i kisim nupela rekot bilong em long 50 mita na 100 mita fri-stail long Yut Olimpiks long Saina.

Long 100 mita em i kisim 58.45 seken na i rausim bipo rekot bilong em 57.72 seken. Long 50 mita em i kisim 25.61 na i rausim bipo rekot bilong em 25.58 seken.

Akara i tok em i amamas long makim Papua Niugini na swim long Yut Olimpiks na kisim nupela rekot. Em i tok em bai trening moa long kamap gutpela swima.

Kosa bilong Tim PNG Swimming, Ryan Pini, i tok em i amamas tru long pefomens bilong Akara na em bai helpim em long wok strong moa.

Ol opisal bilong Australia bai no inap kam

Isaac Liri i raitim

DISPELA yia taim ol PNG Hunters i pilai long Intrust Super Cup, wok pren bilong ragbi lig namel long Papua Niugini na Kwinslan i kamap strong moa.

Long agrimen namel long Papua Niugini na Kwinslan, ol opisal bilong Kwinslan Ragbi Lig bai inap long stap olsem referi na lains men sapos wanpela ragbi pilai i kamap long Kalabond oval long Kokopo.

Long agrimen, Kwinslan Ragbi Lig i luksave long Kalabond bikos em i hom graun bilong ol PNG Hunters.

Agmark Gurias na Hela Wigmen i bin askim sapos em i orait long Kwinslan Ragbi Lig long helpim long givim sampela opisal long stap olsem referi na lains men bilong Digicel Kap gren fainel long dispela yia.

Astingting bilong askim helpim long Kwinslan Ragbi Lig em long strongim moa wok pren bilong ragbi lig namel long Papua Niugini

na Kwinslan.

Sif Eksekutiv Opisa bilong PNG Hunters, Brad Tassell i bin tok em i orait sapos gren fainel i kamap long Kalabond.

Nau taim ol Digicel Kap i surukim gren fainel i go long Lae, ol opisal bilong Kwinslan Ragbi Lig bai no inap long kam bikos ol i no luksave long Lae.

Kwinslan Ragbi Lig i save mekim olsem bikos ol i save lukluk long wanem ples em i moa seif na gutpela long pilai, na long skelim bilong ol, Kalabond em i wanpela gutpela ples bilong pilai insait long Papua Niugini.

Siaman bilong Papua Niugini Nesanel Ragbi Lig (PNGNRL), Sudir Guru, i tok long wanpela midia komprens long dispela wik olsem PNGNRL bai yusim ol referi bilong Papua Niugini yet bikos gren fainel bai kamap long Lae.

Em i tok ol referi bilong PNGNRL i kwalifai, na ol i gat bikpela ekspiriens long stap olsem ol referi na lains men.

Hela Wigmen laikim gutpela gren fainel

Isaac Liri i raitim

SIAMAN bilong Kemele Hela Wigmen, Andy Hetra, i tok tenk yu long Papua Niugini Nesanel Ragbi Lig (PNGNRL) long givim tok orait long gren fainel i kamap long Lae.

Mista Hetra i tok tenk yu tu long Siaman bilong Agmark Gurias, John Nightingale, husat i bin givim sapot bilong em long PNGNRL long surukim dispela pilai.

Mista Hetra i tok dispela em i namba wan taim bilong Hela Wigmen long pilai long gren fainel bilong Digicel Kap, na ol pipel bilong Hela i amamas tru long dispela.

"Dispela em i namba wan taim bilong Hela Wigmen, na tim i no bisi sapos ol i win o lus. Hela Wigmen i pilai strong long dispela yia, na pilai long gren fainel em i wanpela samting we ol Wigmen i bin driman long en," Mista Hetra i tok.

Mista Hetra i tok strongpela pilai bilong Hela Wigmen klap long dispela yia i soim Papua Niugini olsem Hela provins i gat strong long menesim em yet olsem provins. Na olsem wanpela nupela provins, ol i amamas long soim trupela spirit bilong Hela na ragbi lig.

"Pilai long gren fainel em i wanpela ekspiriens we ol pilai, ol spona, na ol sapota bilong Hela Wigmen i amamas tru long lukim," Mista Hetra i tok.

Em i tok planti sapota bai kam long Hela provins long lukim dispela pilai, na gren fainel long Lae i mekim isi long wokabout bilong ol long lukim namba wan taim bilong ol long pilai long gren fainel.

Long makim maus bilong ol lida bilong provins, em i tok ol i laikim gutpela gren fainel, na wanem tim i win, em top tim.

Hela Wigmen bai helpim PNGNRL long givim sekuriti long lukautim na kontrolim dispela gren fainel.



Yangpela swima, Collin Akara, i redi long kalap i go insait long swimming pul.

Lae bai lukim Digicel Kap gren fainel

Isaac Liri i raitim

DIGICEL Kap gren fainel bilong dispela yia namel long ol Agmark Gurias na Hela Wigmen i bin inap long kamap long las wiken long Kalabond oval long Kokopo, tasol ol Hela Wigmen i no bin wanbel bikos ol i bin lukim olsem em i no gutpela.

Long ol ripot i kam long midia long las wik, na tu, long dispela wik, Siaman bilong Hela Wigmen, Andy Hetra i tok dispela gren fainel i mas kamap long Lae bikos em i no hom graun bilong ol Gurias, na tu, ol Wigmen.

Bihain long ol Hela Wigmen i tok ol bai no inap long go long Kokopo long pilai, ol Gurias i bin inap long fofitit dispela gren fainel na kamap wina tasol ol i no bin mekim bikos ol i bin les long bagarapim gutpela nem bilong ragbi lig long kantri.

Siaman bilong Agmark Gurias, John Nightingale i

bin wanbel long gren fainel i kamap long Lae bikos sapos ol i bin lukim olsem sapos gren fainel i no kamap, em bai bagarapim nem bilong dispela kompetisen, na tu, ol spona husat i putim bikpela mani, na ol pilai husat i givim bikpela taim bilong ol bai popaia nating.

Disisen long kisim gren fainel i go long Lae i bin kamap bihain long ol bod memba bilong Papua Niugini Nesanel Ragbi Lig (PNGNRL) i sindaun long bung bilong ol we i bin kamap long foapela de olgeta.

Ol bod memba bilong PNGNRL i save vot namel long ol yet. Taim ol vot long bung bilong ol, bikpela namba i bin wanbel long gren fainel i kamap long Lae.

Dispela em namba wan taim bilong ol bod memba bilong PNGNRL long vot gen bihain long ol i bin vot pinis. Long namba wan bung bi-



Bos man bilong PNGNRL, Sudir Guru, na Siaman bilong Hela Wigmen, Andy Hetra i toktok long midia komprens **Poto Nicky Bernard**.

long ol, planti bod memba i bin wanbel long gren fainel i kamap long Kokopo, tasol bihain taim ol Hela Wigmen i no wanbel, ol bod memba i go sindaun gen na vot.

Siaman bilong PNGNRL, Sudir Guru i tok ol i vot gen bikos ol i les long bagarapim intres bilong ol pilai.

Siaman Guru i tok bikpela

tenk yu long Siaman bilong Agmark Gurias, John Nightingale, husat i bin luksave long intres bilong ol pilai na wanbel long gren fainel i kamap long Lae.

Siaman Guru i tok John Nightingale i luksave olsem em i namba taim bilong planti ol pilai long pilai long gren fainel na em i les long edministresen i bagarapim dispela intres bilong ol pilai.

Em i tok sapos Mista Nightingale i no bin givim gutpela sapot, PNGNRL bai kisim bikpela taim long mekim disisen.

PNGNRL na ol spona bilong Digicel Kap i luksave long olgeta wok ol Gurias i bin mekim long redi long gren fainel long Kalabond long las wik, na PNGNRL na Digicel bai stretim ol long ol mani ol Gurias na ol spona bilong ol i bin yusim long kamapim wok redi nating.

Olgeta tim husat i pinis long top foa bilong dispela kompetisen bai kisim mani mak inap long K165, 000.

Taim midia i askim Siaman Guru long prais mani bilong wina, em i tok em bai wankain olsem las yia.



SPOTS DRO RAUN 25

Fonde: Ogas 28, 2014

7.45pm



ANZ
Bulldogs V^s Rabbitohs



Fraide: Ogas 29, 2014

7.30pm



Suncorp Stadium
Broncos V^s Dragons



Sarare: Ogas 30, 2014

7.30pm



Hunter Stadium
Knights V^s Eels



5.30pm



GIO Stadium
Raiders V^s W/Tigers



7.30pm



Allianz Stadium
Roosters V^s Storm



Sande: Ogas 31, 2014

2.00pm



Mt. Smart Stadium
Warriors V^s Titans



3.00pm



Brookvale Oval
S/Eagles V^s Panthers



Mande: Septemba 1 2014

7.00pm



1300 Smiles Stadium
Cowboys V^s Sharks



Ol poto na stori i kam long NRL websait



BULLDOGS: Tim Lafai bilong Bulldogs em wanpela bilong ol pilaia husat i bin pilai strong stret long las wiken taim ol i winim ol West Tigers. Win bilong ol Bulldogs i lukim ol i sindaun namba 5 long NRL lata. Ol Bulldogs bai pilai egensim ol Rabbitohs long dispela wiken. Dispela gem em bai wanpela strongpela gem bikos sapos ol Bulldogs i win, ol bai kalap i go antap long top 4.

BRONCOS: Ben Barba bilong Broncos i bin amamas tru taim ol i winim ol Newcastle Knights long las wiken 48-6. Broncos bai nidim Barba long pilai strong gen long dispela wiken sapos ol i laik winim Dragons.



COWBOYS: North Queensland Cowboys i bin opim ai bilong ol Rabbitohs long las wiken taim ol winim ol 22-10. Win bilong Cowboys i givim ol sans long pilai long fainel. Ol i sindaun namba 6 long NRL lata.

STORMS: Storms i soim NRL olsem ol i gat strong yet long winim taitel long dispela yia taim ol i winim ol Panthers long Mande.

Raun 24 Poin Lata

Pos	Tim	W	B	L	D	Pts
1.	Sea Eagles	15	2	7		34
2.	Rabbitohs	14	2	8		32
3.	Roosters	14	2	8		32
4.	Panthers	14	2	8		32
5.	Storm	13	2	9		30
6.	Bulldogs	13	2	9		30
7.	Cowboys	12	2	9		28
8.	Eels	12	2	10		28
9.	Broncos	11	2	9		26
10.	Warriors	10	2	11		26
11.	Dragons	10	2	11		26
12.	West Tigers	9	2	13		22
13.	Titans	8	2	14		20
14.	Knights	8	2	14		20
15.	Raiders	6	2	16		16
16.	Sharks	5	2	17		14

Sans bilong Hunters i stap long han bilong ol arapela tim

Ol i wait tasol na stap...

Isaac Liri i raitim

SANS bilong PNG Hunters long pilai long ol fainel bilong Intrust Super Cup i stap long han bilong tupela arapela tim.

Mckay Cutters i mas winim ol Tweed Head Seagulls, na Redcliffe Dolphins i mas winim Ipswich Jets.

Sapos yu lukluk gut long lata bilong kompetisen, bai yu lukim olsem ol Cutters na Dolphins i sindaun aninit long lata na sans bilong ol long winim Seagulls na Jets i liklik tru bikos Seagulls na Jets em ol tupela strongpela tim husat i pilai strong tru long kompetisen long dispela yia.

Ol Jets i sindaun namba 5 long lata wantaim 32 poin, ol Seagulls i sindaun namba 4 wantaim 33 poin na ol Hunters i sindaun long namba 6 wantaim 31 poin.

Hunters bai stap long bye long dispela wiken na ol bai kisim fri 2 poin long mekim total poin bilong ol i kamap 33.

Ol i kam bek long kantri pinis long dispela wik na ol bai stap na lukluk tasol sapos sans bilong ol bai kam.

Kosa Michael Marum i amamas tru long pefomens bilong ol pilaia bilong em long dispela yia na em i wait tasol na stap.

QRL Intrust Super Cup draw

Round 26 (30-31 August)

Home	Vs	Away
PNG		Bye
Ipswich		Redcliffe
East		Wynnum
Norths		Capras
Burleigh		Pride
Souths		Sunshine Coast
Tweed		Mackay

Pos	Tim	W	B	L	D	Pts
1.	Northern Pride	20	2	3	0	44
2.	East Tigers	16	2	6	1	37
3.	WM Seagulls	16	2	7	0	36
4.	TH Seagulls	14	1	8	0	33
5.	Ipswich Jets	14	1	8	1	32
6.	Hunters	14	1	9	1	31
7.	Mackay Cutters	11	1	11	1	26
8.	Bears	10	2	12	0	25
9.	Devils	10	2	13	0	24
10.	Magpies	9	2	14	0	22
11.	Dolphins	8	2	14	1	21
12.	CQ Capras	4	2	18	1	13
13.	Scoast Falcons	1	2	22	0	6

Ol spot poto long wiken...



Ol Poto Nicky Bernard.

Tim NCDC
long media
pul komp.



BAL BILONG MI: Koboni pilai kisim wanpela gutpela bal long AFL resis long Marry Bareks.

MAKIM GUT: Yangpela snuka pilai i redi long pairap wait bal long midia pul resis long Mosbi.

MASKI HOLIM MI YA: Soka eksen bilong PSSA.

PSSA soka resis long Mosbi long wiken.

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



TUNA IN OIL

Moa oil na meat insait

PNG Mosquitoes apim nem bilong kantri

Lukim moa stori long pes 24....

Isaac Liri i raitim

OL i apim nem bilong kantri, Praim Minista bilong kantri i luk-save long ol, na ol i pulim intres bilong planti yangpela mangi insait long kantri long pilai AFL.

Taim ol i pundaun long Jackson's ples balus long dispela wik, ol sapota, famili, na pipel husat i bin stap long ples balus i bin givim bikpela welkam long ol, na tok tenk yu long apim nem bilong Papua Niugini long AFL.

Win bilong ol PNG Mosquitoes i no wanpela nupela samting. Sapos yu lukluk bek long histori bilong dispela AFL Intenesenel Kap tonamen (IC), bai yu lukim olsem PNG i bin pilai long gren fainel taim tonamen i stat long 2002 i kam inap nau.

Dispela tonamen em i save kamap bihain long tripela yia. Long 2002 Ireland i bin winim PNG long gren fainel. 2005 i lukim Nu Silan i

winim PNG, long 2008 PNG winim namba wan taitel bilong ol taim ol i bekim dinau bilong ol wantaim Nu Silan. 2011 i lukim Ireland i winim PNG, na dispela yia, ol Mosquito i bekim dinau bilong ol wantaim Ireland taim ol i winim ol 45-42.

Win bilong ol Mosquitoes i lukim ol i stap olsem namba tu top AFL tim insait long wol bihain long Australia. Australia i no save pilai long dispela tonamen bikos level bilong ol i antap tumas.

Bihain long tonamen, IC Wol Kap Tim i makim tripela pilai bilong PNG long stap insait long skwat. IC Wol Kap Tim em wanpela tim we i save kisim olgeta top pilai bilong tonamen.

Tripela Mosquito husat i stap long IC Wol Tim, Amua Pirika, Gideon Simon na John Ikupu Junia.



Featured Products

- *Treated Mosquito Nets Prevents Malaria
- * Visitect Tests for Malaria
- * Arterakine Tablets Treat Malaria (artemether & piperaquine phosphate)

Good Products, Better Prices, ikam long.

Johnstons Pharmacies Ltd

Phone 325 3185 Fax 325 0190 Email sales@johnstons.com.pg

